

疇隱居士自傳



疇隱居士自傳

無錫丁福保仲祐述

歲月飄忽，瞬過古稀，杜門人海，雖無可述，然回溯前塵，有足資記憶者，聊申短記，以告親知。

第一章 國學

余十四五歲時，聞邑中之好學者，皆肄業江陰之南菁書院，治考據詞章之學。余雖年幼，亦心焉慕之。吳稚暉先生作寒厓詩集序，述當時之情形最詳。因節錄之如下，寒厓詩集序曰，余不能詩，亦不好爲詩，故年二十有三，著學籍。適其時瑞安黃體芳，長沙王先謙，茂名楊頤，長白溥良，先後督吳學，建南菁書院。刻續皇清經解。振樸學於東南。講學南菁者，有南匯張文虎，定海黃以周，江陰繆荃孫，慈谿林頤山。余應選入南菁治學。第一日謁定海先生。先生銘其座曰，實事求是，莫作調人。心竊好之。與無錫范蠡，許士熊等，遂有志理前史，紀禮詰，不暇爲詞人。同舍未成年而所志同者，有上海鈕永建。永建來南菁之前二年，以十五齡天才，爲楊頤所拔。頤取永建所爲古文詞，邀番禺梁鼎芬評定。鼎芬尤禮重焉。厥後永建棄書肄劍，入湖北軍校。鼎芬爲校督，左右之甚至。時長吾曹舍者，爲丹徒陳慶年。慶年爲經師柳興恩姊子。能傳外氏學，慶年好談。常側其頭，唇

翁張，格格笑不止。我等年少，往往慕效而狎弄之，彼亦不忤。我等所居爲詒字舍。各自以爲許鄭遷固聚此八舍也。其時院中彬彬文學之上選，產江南者，則有陽湖吳翊寅，金匱孫揆均，丹陽王英冕，無錫高翔，元和汪榮寶，其尙在童齡者，有無錫杜嗣程，籍六合而家江甯之田其田。其田才筆肆茂。年十三以神童爲王先謙拔食餼廩。意氣甚盛。頗跡弛。院之成年長德，皆爲詒侮。嗣程則秀拔俊整，不好弄也。產江北者，則有籍上海而家泰興之趙世修。泰興又有姚彭年。童子金鉞。世修弟子。寬弱，常受侮其田。然鉞工李商隱偶體文。其田雖上規騷選。卓然成家，勿若也。敬恆所家無錫。時流年相若，談說文史，與南菁諸子上下者，則有廉泉，俞復，丁寶書，顧蔭孫，裘慶年，昌年，曹銓，及寶書弟福保。福保亦一奇童子，十四五卽通治漢魏六朝數十百家之文。後亦應選居南菁頗久。

至光緒二十一年乙未，余二十二歲。肄業江陰南菁書院。見院中藏書甚富。如入二酉之岩，適五都之市。可以盪目遨魂，披發吾十年聾瞽。狂喜無已。乃手鈔院中藏書目一冊。而私自祝曰，他日果能處境稍裕，必照此書目盡購之。豫算擬買各書約數千元。

余聞之王益吾先生曰，爾雅爲羣經樞轄。國朝邵晉涵正義，郝懿行義疏，大暢經指。然待訂正者猶多。臧庸輯漢注，黃奭輯古義，（葉蕙心古注斟亦善。）翟灝補郭，錢坫釋義，嚴元照匡名，龍啓瑞經注集注，並資參究。（書目答問，板本略具，甚便初學。諸書可依以購求。若藏書不多，先就易購者訪求考索。勿得因循亦慎毋得少自足，不思博觀。）宜蒼萃衆說，合爲一書。每正文一節後，首注疏，次古注，次諸家說，（逐條提行，低一格，冠以某日。）全鈔弗遺。此外有爾雅箋注，罕見傳本。及非爾雅專家，而與



本書相發明者，皆可臚列。再加案語，訂正舛譌，推闡遺義，（案語冠以本人姓名，引書必注某書某卷。下同。）務期精密。

說文之學，近代爲盛。二徐傳本互異，楚金多仍舊書。鼎臣多所是正。乾嘉諸儒，總據韻會以求小徐之真。復據唐本蜀本以正二徐之失。立說紛如。王紹蘭說文集注一百二十四卷，未見傳本。擬萃衆說，校正同異，推究義蘊，爲說文解字詁林一書。每篆文一字一行。許氏元文。大小徐本岐出者，雙行標注。次二徐音注。（正文及音注，各本異同者，並詳之。大徐以近日淮南書局重刊汲古閣本爲主。以通行汲古閣五次剜改本，段氏汲古閣說文訂，及朱孫額諸本參校。小徐以祁本爲主。以汪馬本參校。）次諸家說。（逐條提行，低一格冠以書名，或二字或三字，）其段玉裁說文注，王紹蘭段注補訂，鈕樹玉新附考續考，段注訂，鄭珍說文新附考，徐承慶段注匡謬，徐灝說文段注箋，桂馥說文義證，姚文田，嚴可均，說文校議，嚴章福說文校議，錢坫說文辭詮，沈濤說文古本考，鈕樹玉說文校錄，高翔麟說文字通，朱駿聲說文通訓定聲，汪憲繫傳考異，（本朱文藻撰。）王筠說文句讀，說文釋例，繫傳校錄，（釋例宜散入各字下。考異校錄宜入校注下。）惠棟，席世昌，讀說文記，邵瑛說文羣經正字，吳雲蒸說文引經異字，吳玉搢說文引經考，承培元說文引經證例，柳榮宗說文引經考異，程際盛說文古語考，陳瑒說文經考，皆宜全鈔。段注爲世推重，而疏舛甚多。而王鈕徐諸家訂補，尙非極至。此外儻得希有之本。臚舉勿遺。再加補正折衷，宏暢厥旨。（凡純體字，篇末注云，於六書爲某體。兼體字，注云於六書爲某體兼某體。）其聲讀之書，別爲一冊輯錄，期於網羅詳密，共成大觀。

文選爲詞賦家之祖。李善注，包舉宏富，有裨考訂。清代爲選學者俞益博通。今以胡刻本爲主，（考異散入各卷正文及李注下。）毛葉各本參校。（正文互異者雙行標注。）李注晉爲大字。（提行低一格寫。下同。各本互異。及引書與今本不同者，雙行標注。）次五臣注。（注遜於李，前人言之已詳。然亦有可采。全列勿刪。）次劉履文選詩補注，汪師韓理學權輿，孫志祖理學權輿補，李注補正，文選考異，李攀鳳選學規李，選學糾何，余蕭客文選音義，朱垢文選進釋，葉星衛文選附注，梁章鉅文選旁證，張雲璈選學膠言，薛傳均文選古字通疏證，胡紹煥文選箋證，鍾駕鰲選詩偶箋，陳僅讀選意籤，杜宗玉文選通段字會，皆全鈔。再加折衷訂正，爲文選集注一書。古人文辭，遞相祖述，而各具變化。熟精選理，自能洞徹源流。賦家皆宗揚馬。陳思稱揚馬之作，趣幽旨深，非博學不能綜其理。豈直才懸，抑注字隱。至於句式，亦窮極摹擬。如相如上林賦云，追怪物，出宇宙。子雲羽獵賦，則云追天寶，出一方。上林賦云，蓋象金石之聲，管籥之音。太沖吳都賦則云，蓋象琴筑並奏，笙竽俱唱。若此之類，難可悉數。將注選賦，擬先熟讀揚馬諸篇，方能窮其根抵。葉本評語，取列眉端。區分段落，細加剖析。其字句摹擬因襲之處，悉爲標出，庶無遺憾，其後閱二十六年。得日本影印唐寫文選集注殘本十六卷。無撰人姓名。引李善及五臣注外。有陸善經注。有公孫羅所撰之文選音決及文選鈔。皆吾國久逸之書也。全書宜一一輯入文選集注內。

史漢國志，湖南已有爲補注者。晉書以下，惟五代史有集注之本。新舊唐有鈔校之書。其餘諸史，人罕究心。夫歷代各有事蹟典制，並有益實用，無可軒輊。徒溺志文辭，

非眞通史學者也。典午一朝，事實繁富。當時著作，凡十八家。斷簡佚文，未易舉采。眞觀之作，遺議實多。宜仿裴注三國志例，從初學記，文選注，六帖，御覽等類書中，搜輯彙編，分條補注。國朝郭倫晉記，周濟晉略，畢沅晉書地理志補正，洪亮吉東晉疆域志，十六國疆域志，錢儀吉補晉兵志，丁國鈞補晉藝文志，並資蒐討，宋齊梁陳魏齊周隋八朝，宜各爲注。綜其綱要，是有數端。一毛本爲主，殿本互校。二殿本考證，散入注文。三參訂本書記傳，四參證通鑑。五參證同時列國史事。六本書前半互校前代史，後半互校後朝書。七本朝史學家宜兼採。（錢氏考異，王氏商榷，趙氏劄記，陔餘叢考之類，）八金石文字宜廣搜。（以上八條，晉書並同，）九南北史文字異同宜備列。十御覽，冊府元龜諸書所載各代事實，宜詳徵。十一鄭夾漈通志異文，宜參訂。（鄭輯各代紀傳，有竄改，非元書。然亦有取資。能得宋本尤佳。）文字之間，更爲闡發幽奧，釐正譌誤，自有蔚然之觀。晉宋魏隋各志，最宜悉心考訂，足徵八代政教風俗之因革。遼金二史，可用契丹國志，大金國志二書參校。元史時代較近，諸家載記文集，可用旁參。錢大昕毛嶽生諸儒，考訂尤勤，並宜討究。三朝事蹟，又可與宋明互勘。前舉數端，不難隅反。宋史在諸史中最爲繁冗失倫。前人別纂之書，不稱良筆。邵氏晉涵撰宋史百六十卷，已成。聞前有浙人持呈江督，曾文正公已發局校刻。適曾公移督直隸馬端敏公蒞任，無過問者。書遂爲他人攜去。海內留心文獻之士，幸共訪求之。

水經注網羅羣籍，有功於兩漢地志尤鉅。爲輿地家必應究心之書。官校宋本，襲集永樂大典所引，排比原文，出戴震之手。以乾隆三十九年校上。而趙一清校本，先成於乾隆

十九年，至五十一年始謀鋟版。世罕觀大典原文，見校與趙悉合，疑爲弋取。然安有此事。戴氏博考羣書，趙氏覃精極思，遂爾合契古籍，情理宜然。（段玉裁魏源張穆各執一詞，俱可存而不論。）隋唐以降，地名沿革，水道變遷。能爲一書紹酈氏絕學者，渺不可得。黃氏今水經，簡而寡要。齊氏水道提綱，有今無古。或尊黃齊而訾酈氏，不悟水道與地，依事乃立也。當博綜史籍，貫穿古今地理水道，仿酈氏體例，爲水經注疏一書。以各書疏訂酈注。一也。依注繪圖，參證今地。二也。補證各史關涉水地事蹟。三也。補水經注未備各水。四也。四者不備，不爲完書。今擬每經注正文下，有戴趙校語者，駢列之。（雙行標注，勿刪汰。）注低於經一格。疏提行，與注平列。上標疏字。注文應離析者，卽離析之。趙氏刊誤，散入各卷經注下。有辨證者入之疏內。張匡學水經注釋地，董祐誠水經注圖說殘稿，周嬰卮林析論，汪士鐸訂正水經注，文宜備采。再加案語，遂節疏訂補證。每數水合繪成圖，用汪氏水經注圖式。稽合省府縣志，加繪今圖。

治以上各書，果殫十載之功，便立千秋之業。勵志之士，當有樂乎此。至所治之書，宜從容考究，不厭精詳，非以速成爲尙。夫治書之要，首在取正文前訓，親鈔一通，匪特記性不佳者，可以將勤補拙。凡書經手鈔，卽常讀之書，亦生新義。且駢列諸家，淺深顯見。加以考案，折衷自出。如具兩造，而聽五辭。犀分鏡照，自然神識倍充。宋以前及國朝類書，皆宜蒐覽。（世說新語注，初學記，北堂書鈔，羣書治要，白孔六帖，太平御覽，冊府元龜，事類賦注，藝文類聚，可資校訂。淵鑑類函，佩文韻府，經籍纂詁之類，可資考索。偶經觸發，當尋檢元書，勿得依據。）梳櫛字義，以說文爲歸。校訂文筆，當

一以高郵王氏爲法。學人每患涂徑闇昧，欲從末由。苟循斯道，決無歧誤。如或驚爲高美，病其難能。當思日知無忘，歷久弗懈，積小而大，便成通儒。中材以下，皆可勉爲。非必天稟異人，始可從事。每歎功名可遇而不可求，與其慕浮榮，希詭獲，不若守其在我，早謀自立之地也。昔人任爲一書，自非聖經賢傳，不能毫無指摘。立名之事，爭不勝爭。前哲瑕疵，議不勝議。惟有自勤學業，方是實在受用。坐觀徒羨，不勝結網。俟河之清，必非志士。余既知學問之門徑，卽擬箋注各書，先從說文文選下手。

吾又聞諸王益吾先生曰，爲學所以明心，所以養心，人之放心，本難收束。惟讀書可以制之。窮年矻矻，樂此不疲。屏絕外慕，是真正人。卽是眞道學。切勿執漢宋門戶之見，強作解人，束書不觀，妄生議論。大學言誠正必先格致。夫子文章可聞，性道不言。自明得力，祇是好古敏求。朱子爲道學之宗。其讀書一字不放過，未嘗空談性命也。宋儒以後理學家書，亦宜博覽明辨。既究知學派源流，愈以檢攝身心，歸於定靜。朱子近思錄，劉氏人譜二書，言約旨深，尤當時置座右。劉引古爲證，間涉疏舛。須加訂正。念臺一代大儒，固不以此爲輕重。能博採史傳增輯爲書，亦宏道之一端。

經濟非可空談。人苟心術不端，意氣不化，雖才美如周公，祇足以作惡僨事。能由正學生正識，以實心行實事，卽絕大經濟也。霸才客氣，安所用之。人之資質敏鈍，固由天授。心激氣定，可學而能。當熟覽史書，以古爲鑑。至當代掌故，尤貴討究精通，奉爲準的。則道學經濟文章，一以貫之矣。賀氏所輯經世文編，及林文忠陶文毅，曾文正，胡文忠，沈文肅，左文襄，文集奏疏，宜熟觀。皆切於時用者。（曾左書尤要，宜從其虛公鎮

靜處留心。經世文編一書，當有高才通識博覽羣書者續爲之。近世所續，未佳也。）

疇隱盧詩存

余齟齬時好讀離騷。或觸物以寫憂。或悼往以增愴。閒愁疊疊，無端成緒。揆之於衷？非情之正。自辛卯以後，稍變舊轍，好誦愉懌之音，弃置悲涼之作。間涉高曠之語，以弛競進之心。終日瀏覽典籍，以銷暇晷。而罕親楚製，準擬之志，不復作矣。良由屈宋逸步，莫之能追。雖劉彥和所云，吟諷者銜其山川。童蒙者拾其香草。然堂奧未睹，糟粕易襲。憤懣之辭，輒繞筆端。凡屬感時，卽云美人遲暮。偶言寂處，必曰王孫淹留。比之優孟，拊膺多愧。乙未八月，僑寓暨陽。鑽厲餘閒，偶檢敗篋，得舊所爲詩若干篇，強顏存之，以誌曩時之歲月云爾。光緒二十一年乙未八月無錫丁福保識於南菁講舍

雜詩

徘徊出重房。秉燭游西園。惠風清且和。華星一何繁。夜猿啼絕壁。宿鳥鳴樹巔。明月出層巘。皎皎映通川。高閣連暮靄。雙闕浮雲間。躊躇懷舊事。憂思來無邊。春情何紆軫。慊慊正懣然。慷慨放志意。逍遙心自閒。

散步望月

中天浮雲盡。月出城東隅。素輝溶止水。我心與之俱。悠然絕塵想。以神寄空虛。逍遙零露下。清風來徐徐。隔岸爨煙起。隱隱忽有無。萬物任幻化。而我欲何如。

南菁講舍夜讀

素秋儵已謝。寒夜靜無娛。涼颿淒且勁。肅肅撼高梧。絡緯啼欲歇。哀音咽庭蕪。泛覽古竹素。先民貽遠模。晷度無停運。讀書且勤劬。

懷亡友龔光甫璜三首

閒居寡儔匹。慷慨涉重阜。落葉早辭樹。肅肅涼颿吼。陳根感我心。愴然懷故友。故友訂交始。是年歲在丑。昵好敍憂勤。子意良獨厚。繇今回溯之。前言記八九。溽暑遘癘瘡。沈疴屢憂危。三旬病少閒。默默心自怡。流火西警節。寢興母支持。殷勤造我閭。談論豈云疲。忽欲離故土。告別在斯須。臨歧空眷眷。揮手成長辭。去歲豔陽時。羣傳子遘疾。君非蒲柳姿。薄霰詎摧折。忽聞子訃來。心膽俱戰慄。奔喪限川塗。恨乏返魂術。故友良已矣。新知誰寵暱。

龔子有詩數篇，留余篋中，墨痕猶新，斯人已故。每一展玩，爲之隕涕。則知山陽殘管，最足移情。黃公遺墟，偏能感舊。先民追悼，同斯情也。作此詩畢，心猶眷然。時殘漏欲盡，短檠熒然。風驅敗葉，若聞足音。起視庭外，絕無影響。晨星耿耿而欲曙，孤雁嚙嚙而南征。欲擬楚辭，招我亡友。心繁無緒，不能成句。迺巡檐而呼，入室而寐，夢以求之，以當良覲。

時興詩一首

中年識損益。而無俗慮牽。開襟自嘯傲。俛仰常悠然。時立深林下。閒聽樹上蟬。隴首過歸犢。落照餘山巔。寥寥生虛籟。清風來無邊。借問閒居味。白雲在遙天。

傲古從軍行

驅馬出長城。塞北秋風早。水欲凝土窟。雲不開山道。甲光照黃沙。旗聲捲白草。日落鼓角悲。天寒木葉老。征夫今何之。悵悵心如擣。

傲甘復宿山家

秋意滿空山。暝色蒼然合。夜深露團屋。窗破月侵榻。微風送晚涼。虛籟遙相答。

傲何中宿田家

日落炊煙起。天靜秋氣爽。晴空何澄明。稻隴孤月上。茅屋清且閒。幽人自心賞。

傲陸游夜出偏門還三山

步出西郊外。一徑青松晚。微月掛疏林。宿鳥沈層巘。幽燐出荒墳。熒熒隨風遠。可憐墳中人。一去不復返。我心何慨慷。天道有益損。富貴亦徒然。歸來加餐飯。

早起

宿雨瀟瀟過。檐前滴空翠。晨光明萬頃。山川流清氣。草木皆蔥芊。春色滿天地。悟出塵俗性。別有閒居味。

初冬晚眺

天寒日光薄。孟冬氣已肅。暮靄生孤城。荒煙聚老屋。窮巷牛羊歸。茅檐有鳥宿。隱隱星出雲。縱縱風掃木。漁燈明前渡。野鼠竄高陸。

城西行（己丑十月掃墓惠山作）

步出城西門。遙望城西路。路旁何纍纍。皆是荒墟墓。刮面悲風冷。連山寒雲沍。荒墳臥

牛羊。故陵窟狐兔。人死如春霜。人生如朝露。啞啞鳥哀鳴。冥冥日欲暮。飄搖灰作蝶。鬱律煙生樹。嗟哉秋已盡。人無金石固。

秋夜獨酌

心源閒且細。鎮日不知愁。有客沾清酒。銜杯餞暮秋。衣冠盡兒戲。事業付東流。意氣常如是。寥寥莫與儔。

倣張船山齋居詩一首

漸覺疏成品。吾生任所之。閒看散雲後。孤坐月高時。夜靜風初起。燈昏鼠暗窺。達人能養拙。秋味寸心知。

閒坐得句

宵靜生虛籟。新涼一味清。燈殘知夜永。月出覺心明。無念全真性。看雲悟世情。中年能達理。大道識虧盈。

歲暮懷亡友高仲安

駒隙匆忙殘臘盡。閒愁疊疊不分明。虧盈身世如碁局。牢落生涯付管城。欲賦招魂慙宋玉。無端思舊託蘭成。去年送別澄江路。往事淒然涕泗橫。

暮歸

暮煙起遠林。宿鷺響枯蓼。寒月光尙微。天風生木杪。

雨夜述懷

煙消茶鼎夜初靜。葉滿空廊風怒號。自古英雄悲失路。一窗寒雨讀離騷。

癸卯應長沙尙書聘來京師見應經濟特科者口占一絕
不學相如賦子虛。辛勤若個類鈔胥。過江名士知多少。畢竟曹倉一蠹魚。

閒居

人生如夢幻。夢境亦堪娛。山水皆奇蹟。詩書盡坦途。光陰新日月。生計舊桑榆。爲道看雲去。雲閒澹欲無。

憶昔

憶昔游皇都。攬轡長安道。丈夫貴自立。棲身有素抱。時運日以新。形骸日以老。行樂須及時。知幾亦當早。挂席從此辭。菽水承歡笑。三載客燕京。誰似江南好。

蕪湖道中飢民感賦

野草都挑盡。瘦民不瘦官。風濤前路惡。雨雪薄裝寒。豺虎牙爭厲。瘡痍血未乾。飢號聲載道。吹不到長安。

蕪湖道中大雪雨感賦

北轍南轅已十年。客中小住且隨緣。半肩敝篋關山路。一襲征袍雨雪天。溫飽由來非我志。飢寒誓不受人憐。風波本屬尋常事。磨鍊精神着祖鞭。

出吳淞口

不到吳淞口。於今已六年。老夫仍故我。滄海忽桑田。楊子悲歧路。尼山歎逝川。離愁何所似。秋水接長天。

答京友

家住江南舊板橋。長安殘夢付漁樵。無心沮溺安知孔。避世巢由不識堯。烈士暮年還射虎。英雄失路慣吹簫。牛醫賤技吾藏拙。五斗元來未折腰。

出崇明赴排衙鎮夜行口占

野田多積水。四顧益蒼涼。地僻孤城小。人稀海市荒。秋星寒有角。燐火闇無光。客路行多險。迢迢夜未央。

崇明排衙鎮曉發途中口占

孤客中宵起。繁星尙滿天。露光團作雨。月色淡如烟。矮屋鮮雞犬。長塗盡墓田。曉行歌緩緩。殘夢益淒然。

宿遂園

斗室絕塵囂。靈草媚清妍。拂衣謝人事。放曠學逃禪。深入無所得。超拔有漏緣。歸空絕四相。悟道離言詮。主人亦過客。爲我烹松泉。疏桐響夜雨。修竹浮寒烟。焚香開梵筴。招隱賦遊仙。雞鳴將戒旦。曙光益淒然。靡靡載行邁。朝霞麗中天。

登高有感

長嘯倚層樓。拓開萬古愁。薄交誰管鮑。衰世乏伊周。生命悲屠狗。衣冠盡沐猴。憑空一俯仰。竟白少年頭。

飯輪船中粗糲不能下咽感賦

勞役將何已。飢驅任所之。食艱寒士賤。道溼素衣縑。在客加餐強。思家下咽遲。何嘗厭粗糲。世味早深知。

遊山寺

松風起天半。空翠落層層。樹隱疑無屋。鐘鳴知有僧。塵心到山淨。流水入池凝。悟得三生夢。禪龕一點燈。

贈岐伯

昔年別君處。楊柳正依依。追憶恍成夢。相看非少時。中原堪一慟。吾子欲何之。謝却侯開客。長歌胡不歸。

奉和贈岐伯元韻卽以書贈

張祖翼（述先）

大隱隱朝市。青囊猶相依。韓康非賣藥。傅山亦逃時。世事已如此。天涯任所之。羨君有絕技。實至自名歸。

自遣

夢中尋夢幻逾幻。身外求身空復空。轉瞬興亡無限恨。拈花一笑是英雄。

擬山居

門外秋山靜。空庭落桂花。圖書一二榻。雞犬兩三家。魚跳月波碎。鴉棲風柳斜。夜來將入定。萬籟寂無譁。

秋感

海上客衣單。年華指一彈。秋深人影瘦。月落雁聲寒。往事有餘痛。殘棋不忍看。干戈遍宇內。何處是長安。

寫懷

悠悠豈必盡知音。漫向人前論古今。道外無言方是道。心中有事卽非心。獨超衆嶽崑崙
壯。盡納羣流滄海深。我是年來無一字。荒江抱膝且長吟。

秋感

故鄉遙憶舊山河。客裏光陰一瞬過。白眼相看知己少。黃金漸盡閱人多。世途善幻冰成
炭。人海無風水亦波。十載京華空一夢。閒看螻蟻上南柯。

曉起

淒絕連朝雨。春江水正深。百花三月夢。萬事五更心。衆醉自成俗。吾愚亦豈今。年來諸
趣淡。奚事滌塵襟。

遣興

偶然生我於今世。前後茫茫各萬年。矢志先辭蘇季印。著書早着祖生鞭。平生恥作依人
燕。兀傲幸存負郭田。惟有精神能不朽。全由人力不由天。

回里感舊

少壯無多日。能逢笑幾回。故人留不住。明月去還來。鶴夢千年斷。松聲萬壑哀。童年游
釣處。往事半成灰。

過舊居

一作他鄉客。無心懶下車。又來新燕子。還入舊年家。春雨生池草。秋霜落鬢華。江村風
月好。只可話桑麻。

宿山寺

落月隱簾櫳。孤燈澹不紅。雞鳴山寺曉。梵寂佛樓空。苔滑連朝雨。荷殘昨夜風。峯巒千萬疊。不辨路西東。

秋興

閉戶時尋樂。清宵事事幽。風吟三徑竹。雁語一天秋。長笛來漁艇。疏燈下小樓。開編心自遠。日與古人遊。

題老友陳仲英先生五十歲小照

追思昔日從游好。四十光陰彈指間。（余識陳君已四十年）我在當年年最少。而今亦覺鬢毛斑。

總角相交有夙因。文場角藝已成塵。年來親故多離索。惟我與君三四人。稚公海外孟堅死。今日逢君祝五旬。同在天涯傷冷落。十年等是未歸人。交存古道誰青眼。人過中年易白頭。薄酒難尋千日醉。與君同上謝公樓。

感懷

逐歲朱顏改。蕭蕭鬢已霜。幸逢新世界。飽看小滄桑。賣藥窮愁計。長齋老壽方。故鄉風景好。底事出山忙。

自歎

老年華暗自傷。鄰家乳臭盡爲郎。交游倦後存真率。文字年來愛老蒼。述作何曾心力瘁。頭顱已覺鬢毛霜。男兒事業今何在。慘淡神州國恨長。

夜坐得句

浮生入夢種塵根。離合悲歡空斷魂。掌上劍花寒欲落。樓頭月影靜無言。事難了處惟生
死。身不由吾况子孫。一枕黃梁炊未熟。幾人留得釣竿存。

秋感

蕭蕭落葉響迴廊。星斗闌干夜未央。世上有誰非草木。人間何處不風霜。萬言著述蛇添
足。十載棲遲燕借梁。得失雞蟲何足算。神州浩劫感滄桑。
年年浪迹未歸家。荒落東陵數畝瓜。每悔失言由太直。欲求如意本先差。斬蛟有膽慵磨
劍。搏虎無心懶下車。湖上飽看風月好。秋霜爭奈鬢先華。

題五十歲小影

年華五十如彈指。誤落塵凡劇可哀。夙世未能成佛去。此生又爲讀書來。
藏書十萬又三千。笑侯傲王別有天。莫謂老夫生計拙。長安賣藥自年年。
道院談經亦偶然。神仙未學學逃禪。題詩又是留塵跡。一笑人間五百年。
禪龕空寂一燈明。秋盡寒來布被輕。居士萬嫌風味薄。本來無物本無生。

高澹虛靜動止夷。猶規撫漢魏下逮陶公五律亦近襄陽摩詰其餘皆唐體也與世無競心地湛
然慘淡神州國恨長。豈尙有精衛形天意邪爲之三歎小弟李詳拜讀

語真而匪庸意靈而不泛不著鐫刻風韻天然當於左司摩詰之間求之壬戌初冬弟左念康讀
訖

第二章 算學

丁子仲祐，喜譚算，嘗請業於余，後又肄業江陰南菁書院，從學於余弟若溪，余兄弟所致書函，凡有關於算術者，丁子寶之如拱璧，豈將爲後日著書地步歟，去年吾邑楊君範甫創設敦實學堂，余薦丁子爲算學教習，邑中來學算者甚衆，丁子因諸生未識象數門徑，撰算書提要三卷以授學者，余爲校閱一過，見其擇言簡要，持論平允，附記刊誤，尤爲切實，知非鈔撮序跋之語，以泛論空言爲提要也，余近日屢病頭暈心跳，似已中風，或因用心太過，以致有此腦病乎，丁子近日亦以習算太勤，身體漸瘠，幾似余之衰頹，余語丁子，盍以演算之暇，兼及體操衛生之學，習勞以健身體，使少用心而多用力，或者可不至於病，余閱歷既久，每見績學之士，有以腦筋費血太多而喪厥生者，故余序丁子之書，惜其布算之太繁賾也，爰舉藥之言以爲丁子勸，然余之所以勸丁子者，余自己亦不得免焉，豈不可笑也歟，光緒二十五年十一月同里華蘅芳序。

第三章 醫學

吾國醫藥，有四五千年之經驗，能治愈之病甚多，且有特效祕方，其靈驗有在西藥之上者，所以今之患病者，尙有一大部分篤信吾國醫藥，而無絲毫之疑也。

余於三十年前，在日本調查彼國之爲漢醫者，其論病之原因，症候，病理，診斷等，皆已科學化，惟處方則用漢藥，余回國後，詳細調查國醫最大之缺點，在於無解剖學，生理學，組織學，胎生學，細菌學，病理學等基礎醫學之智識，又無傳染病及內科學等之世界新智識，故政府開醫學大會，或國際開防疫大會等，國醫皆不克列席，甚至與西醫在病

家會診，凡論說病原，症候，病理等，皆不合於科學之原則，而且昧於各國醫學日新之趨勢。

凡百科學，皆以日新爲進步，而於醫學一科爲尤甚，近世飛行機發達，卽有所謂航空生理，航空衛生，並有預防之法律，潛水事業及潛航艇發達，卽發見特殊之潛水病，現正從事於研究，蓋以不獨地上一切之病，卽天之上，地之下，有生活卽有疾病，有衛生，皆當從事於研究者也，不但此也，試觀近時病人之就診者，已知向醫生詢問瓦設曼反應如何，（梅毒反應）血壓如何，在二十年前測量血壓之血壓計，僅爲教授生理學時置備一二，以示學生而已，今則成爲實地臨診家日常必需之器具矣，至於疾病之診斷，稍須綿密慎重者，亦已必須檢查其血液，視有無瓦設曼反應，此爲二十年前所意想不到者也，此皆日新之進步也。

近世醫學之分科，日益詳密，往往於分科之中，復有分科，其部目因此而日以擴大，故各國於舊有之分科外，其新設之獨立部門，有腫瘍科，結核科，矯正外科，愛克司光線科，醫療機械學科等，至於疾病，亦多分細目，非該科之專門家，皆已不能知其詳也，以手術言，如開腹術在三十年前，因消毒不完全，頗感困難，醫生及助手，每自前日卽齋戒沐浴，冒險爲之，在今日祇須設備稍完全之處，手術室全部易於完全消毒，機械及其他等亦消毒無遺，行之故已極易，至於麻醉，亦不用大規模之全體麻醉，單用局部麻醉，已可行大多數之煩難手術，胃腸之手術，昔日視爲極不易者，今日則腸與胃之吻合，或內臟疾患部之摘出吻合等，在專門家幾視如皮膚表面事，皆容易爲之矣。

近時對於肺結核，有以外科手術而得確實有效之治療者，其法有三，一曰人工氣胸，二曰胸腔改形術，亦稱肋骨切除術，三曰橫隔膜神經之制止，三者各有其適應之用法，要皆由根本上着想，以治療肺癆者也，所謂人工氣胸者，即俗稱空氣針，係用特別方法，將氣體注入胸腔內是也，蓋肺臟於胸腔內，並不與胸廓黏連，其表面與胸廓之內面，均有滑澤之胸膜一層，覆於其上，其間則別成一間腔，吾人即利用此間腔，注氣體於其中，以成人工氣胸，氣體注入胸腔後，肺臟即被壓迫而萎縮而靜止，肺既萎縮而靜止，遂可減除緊張狀態而得休息之機會，因此其病遂易於治愈，如肺部已有空洞，則空洞亦可因壓縮而四圍得以密接，由新組織之增生，而空洞即漸漸消滅，又因萎縮之肺，呼吸微弱，血流徐緩，淋巴液鬱積，此可停止患部之出血，及制止患者自身結核菌之轉移，或傳播於他人，並可減少結核菌毒素之吸收，故患者自行人工氣胸後，其最顯著而最先得之效果，即為吐血停止，潮熱速降，痰中結核菌消失，體重漸增，全身狀況佳良，故人工氣胸，實為現代療治肺癆之唯一善法，且無論老幼皆可施行，毫無痛苦，在施行期內，並可照常工作，此尤為其特點，胸腔改形術，即肋骨切除術因不能行人工氣胸及行而無效者而行之法，其法視病情如何，而切除其若干根肋骨，以使胸廓凹陷，將病肺永久壓縮，以達治愈之目的，其理與人工氣胸同，橫隔膜神經之制止，亦於不能行人工氣胸及行而無效時為之，其法即將頸部之橫隔膜神經切斷，有時或僅攝制，使其神經之效用消失，而橫隔膜因以上升，不復移動，此時胸腔之地位縮小，病肺遂被壓縮而得以自愈，其理亦與人工氣胸同，此三者皆用器械萎縮其病側之肺，而使之安定，以阻止病部發生之毒質，循環於血液中，故一時

能得大效，此亦治肺病之一大進步也。

愛克司光線，今已獨立爲一科，於診斷時，可以知心肺及各內臟與骨等之異狀，在治療上用於血液病，皮膚病，癌腫結核等極有功效，在內外科已占重要之位置，固不待論矣，至於產科，婦人科，皮膚科，及其他各科，亦競相置備，今已成爲不可少之一物，電氣亦不但用平流及感傳電氣器械而止，更有新創所謂電氣浴者，又有可使筋肉及骨之內部溫暖者，名曰透熱機，又有代日光療法，用紫外線治療器，名曰太陽燈，用赤外線治療器，名曰石英燈，於各科皆有特效，銩之爲物，本新元素之一，其放射光線，可治難治之腫瘍，及其他慢性病，凡此種種，皆爲醫室中不可少之新器械也，此爲理學的療法，至化學的療法，亦發明無數新藥，早已出售於市場矣。

現代之醫學，何以有如此之進步，如此之變化發展乎，試觀近代病理之變遷，當可瞭然矣，細胞病理說，爲德國之維爾效氏及其徒所建樹者也，謂人體各器官之細胞，一有變化，則發生疾病，若摘出其病的細胞之局部，或藉物質交換之作用，恢復該細胞之健全，病即可愈，今欲觀病細胞之變化，或行屍體解剖，視其發生病變之局部，或製成屍體或生體之病變局部之組織切片，染以顏色，用顯微鏡檢查，於是多數之病理解剖學者，由此而研究各臟器及其組織之變化，故對於疾病之病的變化智識，極其詳細，與此互相提攜之實地臨診家，亦自然對於各器官之病理，求其與生理作用所以不同之故，因此逐年增出分科學專門家，遂成爲今日之情勢，皆由此細胞病理，與以極大之影響也，此細胞病理，所以成爲疾病智識之基礎矣，其次又爲輓近醫學之大潮流者，則爲細菌學。

德國之古弗氏爲細菌學之泰斗，自發明各種病原菌後，而各國之細菌學，皆大有進步，凡各種傳染病之病原及性質，漸能明瞭，其治療法及傳染病預防法，亦隨之而進步，然細菌學家欲發見一種新細菌，證實其爲病原者，實非易事也，倘發見細菌後，即須研究其如何純粹培養，既得純粹培養，即用以注射動物，注射幾次，至不感染其病而後已，從如此試驗之動物，所得血液之血清，是爲免疫血清，其濃者作治療液，薄者作預防液，細菌學家須經過如此之研究與試驗，而後可以成功，其最初之治療血清，祇有白喉血清而已，（一八八九年頃）其後逐年製造，至於今日，已有傷寒，赤痢，百斯篤，肺炎等種種血清矣，其次爲細菌學家所製造之治療劑，尙有與此相類之伐克精，此係將細菌之純粹培養者致死，用其溶化於食鹽水或在炭酸水之浮遊液注射，使得傳染病之免疫性，即用作傳染病之預防液，可以預防傷寒，假性傷寒，流行性感冒，腦脊髓膜炎等病，然亦非僅預防而已，亦可用作治療液也，其製法之中，尙有將細菌之浮遊液，不用生理的食鹽水及石炭酸水溶化，而代以同一傳染病之免疫血清者，謂之感作伐克精，又有混合種種之細菌製成者，謂之混合伐克精，將細菌煮沸而濾過者，則爲煮沸伐克精，此外由其製法而有種種名目之伐克精，東西各國所製造之各種伐克精，已在七八十種以上，製造者並不限於官立之傳染病研究所，各地之私立研究所，亦競相製造，爭其效果之優越，以售之於市場，故各國政府，因此已不能不制定法律，將其濃度及價格規定，制定販賣血清類規程，凡近時所稱某某血清，某某伐克精，或某某感化伐克精，用於吾人疾病之預防及治療者，皆爲近代之新生產物也，然近時之學者，尙不以細胞病理說及細菌學說而滿足，近來所盛行唱道，

對於醫學發生大影響者，則爲維他命說。

維他命說，如謂缺乏維他命B，即現出腳氣之症狀者是也，英國之霍普金氏，於一九一〇年頃，謂吾人之營養要素，除向來所知之脂肪，蛋白質，含水炭素，及礦物質等之外，尚有一維持生命所不可缺之物，名之曰維他命，此物非身體內自能生出，須從食物攝取，其作用爲使身體之細胞燃燒，或促進醱酵作用，對於身體之新陳代謝，有重要影響，此物不能用化學反應證明，僅能用動物試驗證明之，此物質中之溶於脂肪者，爲維他命A，溶於水者，爲維他命B，能對抗血液之敗壞者，爲維他命C，此外尚有維他命D，E等，缺乏此等維他命之狀態，名爲維他命缺乏症，例如夜盲症，結膜乾燥症，腳氣，壞血病，小兒軟骨症，及其他營養不良之狀態，蓋由於新陳代謝不良之故也，維他命B，含於米糠之中，試用純白之米飼鷄，則發生與腳氣相似之病，名爲白米病，因維他命B之缺乏，與腳氣病極有關係，故日政府特設腳氣研究會，以從事於研究，一九二五年，世界之熱帶病醫學會，在日本開會，對於腳氣之原因，治療，預防，皆有研究發表，日本爲全世界流行腳氣最盛之地，故其研究具極大之規模，而且慎重，在萬國熱帶醫學會，對於腳氣之預防，曾提出用法律規定，此後白米，只可搗至某種程度，惜未經議決而保留也，維他命D，多藏於青綠色植物中，及幾種根莖與麥芽內，又有含於蛋黃，乳酪，動物脂肪者，營養問題，爲世界各國之嚴重問題所促成，不可謂非醫學之一進步也，維他命說，確爲現今醫學界之一重要學說，然尚有較此更重要者，在近時頗有改造全部醫學之勢，即內分泌說是也。

維他命D，其功效能治軟骨症，及小兒生齒時一切缺乏鈣質之病，最奇者以消失維他命D之食物，曝於日光，能使已消失者即行恢復，人體亦然，如蟄居暗處，久之亦生軟骨症，所以吾人宜常行日光浴也，各國對維他命之缺乏症，及營養不良，脚氣等之治療及預防，現有多數維他命之營養劑及治療劑出售，可謂盛極一時，皆為近代之新藥物也，其用法並不限於一定之維他命缺乏症，臨診家凡見有不明之營養不良之狀態者，立即注意及此，都用維他命治之。

各國有所謂營養研究所者，除研究維他命之外，並指導國民如何可得最廉價，最多滋養之食品，此蓋由歐洲第一次大戰內分泌說，謂人體中之內分泌腺，如甲狀腺腦下垂體，胸腺，副腎等分泌一種「活路蒙」，流入組織或血液中，其作用頗為奇妙，如甲狀腺肥大增殖，精神上亦起變化，或易怒或變為神經質，或者手顫，反是，則為甲狀腺萎縮，於是身體之發育不良，皮膚現出水腫，精神上則記憶力減退，變成癡鈍狀，又如副腎之髓質所分泌之副腎精，（亞度列那林）能刺激分布於血管之神經，使血行佳良，副腎有病，則皮膚變青銅色，精神變成無元氣無慾狀，此等內分泌腺，有一種活動，則他種亦隨之而活動，有一種停止活動，則他種為之補償，其彼此相互之妙用，頗為複雜，又有與此活路蒙之作用相連絡而頗占重要之位置者，則為植物性神經系統，（交感神經與副交感神經或迷走神經）此系統若受內分泌素刺戟，則有某神經發生促進之作用，同時亦有某神經發生制止之作用，例如副腎精作用於交感神經，則心臟之作用加速，但同時作用於副交感神經，則制止其促進作用，使心臟之跳動仍得其平衡，故內分泌若起障礙而失却調節神經之作

用，經歷長久時日者，單就血行之關係觀，亦已難於維持其生命矣，此內分泌與植物性神經系統及腦髓之關係，所以爲最有興味之問題也，從此等關係而研究之，對於精神現象亦已漸次明瞭，例如向來對於智力方面視爲大腦皮質之作用，而今則謂感情方面由於大腦之下部即腦幹及內分泌對交感神經有密切之關係是也，又如腦下垂體之作用增進，則骨端之發育粗大，名曰骨端巨大症，可見內分泌對於血行，物質交換，身體之發育，精神機能之發育，皆有重大關係，如內分泌腺一起障礙，則害及身體及精神發育，或物質交換，發生變化，成爲病態，故近時有種種內分泌腺之「活路蒙」藥品，出現於世，欲以拯救身體精神發育之缺陷，及物質代謝病，是等藥品，皆從甲狀腺腦下垂體等丸卵巢等所製成者，故又名臟器製劑，今已多至不可勝數，可謂臟器劑全盛時代。

現在學者，對於內分泌研究甚盛，將來當更有驚人之發展，例如同一細菌，同一疾病，而或死或不死，謂爲由於體質，而對此體質之觀念，今日已由內分泌說而大改變，想此後當更有一番之改造，輓近之醫學，自細胞病理而細菌說，近時則有維他命說，活路蒙說，順次勃興，而一方尚有銑及愛克司光線，電氣透熱等物理療法，烏乎，可謂盛矣。

各國關於公衆衛生之進步，如自來水，陰溝，設施之普及，傳染病之預防，皆有詳細之設備，對於預防，從前除種痘之外，別無所謂預防注射，現在則一發霍亂傷寒等，立即行預防注射，有流行性感冒時，亦行預防注射，幾於一年中無日不有預防注射，與昔日全異其面目，對於結核及梅毒之預防設施，亦日有進步，對於學校衛生之設備，有林間學校

之類，與其他特殊之兒童保護事業，有禁售煙酒於未成年者，對於勞働者亦有保健法律，以保護勞働者之健康，衛生博覽會，及其他醫事衛生之宣傳，亦極發達，近來之報章雜誌，皆闢有衛生一欄，灌注衛生智識於齊民，婦女雜誌，尤多刊登婦人病小兒病等記事，此皆公衆衛生之進步也。

然一方面雖有如此發展，幾乎不留尺寸之餘地，但對於遺傳之事，則尙祇有學說而未見應用於實地，尙須待此後之努力，德美兩國，頗有研究遺傳學大家，對於精神病人，如精神之薄弱者，精神變質者，及其他有精神病遺傳素因者，皆由法律強制執行，將男病人之輸精管，或女病人之輸卵管割斷，於斷管之兩端行結紮手術，使失去其生殖力，以免惡質遺傳，流毒社會，使人種日趨強盛，美國德國已經實行，而他國則尙不多見也，又疾病有因精神作用而起者，又有當用精神療法者，雖經一部分之精神病學家作有力之唱道，然仍未能支配全體醫學，以此之故，凡精神療法家及非醫師之智識階級，頗謂現代之醫學，偏於物質及理化學療法，此係動物之醫學，而非人之醫學，對於人之主觀，絕不稍加顧慮云云，此誠爲現代醫學之一大缺點也，然近時自內分泌說出，對於精神與肉體之關係，已陸續明瞭其新事實，各科之臨診家，亦對於疾病之精神原因及由精神作用之治療法，頗有相當之注意，故精神療法，此後亦將改觀，兼顧物質與精神之完全醫學，當可勃興於將來，以增人類之幸福也。

德國爲日本醫學之導師，並爲世界醫學學術之先進，但自經歐洲第一次大戰後，其進步一時頓挫，惟其後德人以爲欲挽回國勢，支付賠款，須藉科學學術之力，故其國尊重科

學之念甚深，非如吾國之重視文學美術所可比也，因在此二十年中盛興各種工業，生產製品，一方提倡節儉，以造成富有之實力，在醫學方面，則盛行製造新藥，販出各國，其最可注意者，即無論何處，凡建新工廠，其預算中必有一筆巨額之研究室經費，蓋以爲欲以最廉價最多量生產最良之物品，須常靠技師之改良研究故也，就此一事，亦可見其尊重科學之國俗矣，美國之醫學，其研究室之規模與設備大體，未見優於日本，但研究室外之學術應用及其普遍，則在日本之上，例如各都市之自來水，陰溝，其設備之進步，固不待言，結核之預防及其他諸般之衛生設施，皆較日本爲進步，此固與其國之財政亦有關係，但一方亦係國俗之優良使然也，如禁止有十二指腸蟲及蛔蟲等人入國，實爲他國所不易仿行之大規模設施，又如山額夫人之宣傳限制產兒及其技術，則已世界聞名，其他如洛克費拉財團之以研究費供給世界著名之醫學研究者，或捐巨額之研究費於各國之研究室，其事實早已著名於世界矣，法國之醫學教育，頗可備參考，在德國與日本，係先授基礎醫學，自解剖生理開始，順次及於臨診實地醫學，若法國則不然，自毫無所知之一年生，即使應接患者，基礎學之智識，與臨診學之智識，一時並授，雖有混亂之感，但經一二年後，讀成書，聽講義，自能獲得有系統之確實知識，以此爲自然教育法，在法國不但醫學如此，即其他方面，亦常有天才的創造，而每由德國大成之，此天才的創造，固亦由於國民性，但其教育法，亦不無關係也，其他如瑞士以山水之美麗著名，故結核療養所亦極發達，英國因英吉利軟骨之化病甚多，故對於此之研究，亦較有進步，日本之醫學，在最近之五六年中，全由傳入德國醫學而來，其最初之三十年，除細菌學之外，學術尙未能獨立，自

歐洲第一次大戰以後，各科之研究，始漸具獨立性，從前欲從事醫學之研究工作，須留學德國，現在則各大學之研究室，皆盛行動物試驗，理化學試驗，以從事於研究，故從前欲得博士學位，惟有出洋留學之一途，而現在則不出國門，已可實地研究，博士之出產，幾於每日可獲一人，醫學一科，可謂發達極矣，但每次開各科聯合之醫學大會時，演題雖有二千之多，而其最大部分，則大都為基礎研究之末節，多與日常最需要之診斷治療衛生之關係甚少，故主持大會之首腦部，每次大會，對於研究課題，皆希望擇近於實地應用者，並希望能改善一般研究之方針，而尙未實現也，然現時日本之醫學，已能脫離附庸而獨立，與世界第一流國比，已無多遜色矣，但與他國之長處比，則尙多不及之處，且其研究術式及原則，仍蹈襲歐美成法，而甚少獨創也。

吾國有西醫法之輸入，自合信氏西醫五種始，至今已六七十年矣，以國家之多事，政府諸巨公固未暇注意及此，又或以醫爲小道，與國之盛衰無關，故尙無國立之規模宏大之學校及各科之研究所，學醫者大抵寒士，個人之力量有限，每以醫術爲謀生之具，故役役一生，不過爲一實地臨診家而已，而無所發明也，余曩時赴日本，由青山胤通博士之介紹，入帝國醫科大學及附屬醫院，往觀解剖室，愛克司光線室，內外診察室，鏡檢室等，又往青山病院，帝國腦病院，胃腸病院，千葉醫學校傳染病研究所等處，爲實地之調查，每見各科之研究室內，有研究細菌學者，病理者，以及種種醫化學藥品者，皆埋頭伏案，終日在室內研究，卽星期日亦有不外出者，將其終身以研究爲生活，此學術之所以勃興也，不但正式之醫學機關有此種之專門學者，卽如小石川養育院，岡山孤兒院內之醫生，

在該院之研究室，終日研究細菌，欲步北里緒方之後塵，而爲發明家者，亦甚多也，此余在該院調查時所親見者也，吾國政府，不提倡於上，而學醫者爲生計所迫，無研究之精神，故醫學一科，自六七十年以來，其進步甚爲遲緩，言念及此，爲之瞿然而思，愀然而悲矣。

第四章 紀遊

遊北京

光緒二十九年癸卯三十歲，五月廿七日，爲經濟特科覆試之期，余趁此時機，欲至內城一遊，天甫明卽起，着衣冠，與吳君和甫，進東華門，見華師若溪，楊仁山，聶雋威先生等，皆在焉，至太和殿前，此殿之雄偉莊嚴，爲從來所未見，其闊約有五六十丈，分爲十間，其旁有大金缸四，其前面有古鼎六，銅鶴二，銅龜二，此處之空地，約闊四十丈，長百丈，鋪地用雕花之白石，比平地約高五六丈，其下有白階級數層，皆雕刻龍形，離階之末層四五丈外，與有品級石數拾枚，刻以各官之品級，蓋百官朝賀時所立之位次，皆依石而定也，再前則爲太和門，氣象萬千，巍乎大哉。

遊日本

宣統元年己酉，三十六歲。正月，盛宮保囑余聘請譯員八人，譯財政叢書。聘楊君嵩生爲外科醫員。修律大臣奏定法典草案，第二百九十六條，凡未受公署之許可，以醫爲常業者，處五百以上罰金。律至嚴也。去歲五月兩江總督端制軍，有考試醫生之舉。凡分

五等。曰最優等，曰優等，曰中等，皆許其行醫。曰下等，不准行醫。許其學習。待學優再行考試。曰不列等，勒令改業，不許學醫，法至善也。今歲四月，余偕俞君伯銘赴南京督院應醫科考試。首題論中西脈學之得失。二題論中西藥學之異同。三題論古人之用麻醉藥。四題論愛克斯光線之功用。五題論中西鍼法。六題論鼠疫病因療法。七題論說文恂字，以證知覺屬腦之說。監考者爲提學司陳子勵方伯。余得最優等開業證書。伯銘得優等證書。旋奉端制軍檄，特派爲考察日本醫學專員。凡日本各科醫學，及明治初年改革醫學之次第，與日人所錄用之中藥，以及一切醫學堂醫院之規制課程，均調查無少遺。余又奉盛宮保檄，及宮保囑余面呈駐日胡公使書及咨文各一通。其咨文云，爲咨明事。照得本大臣現在江蘇省城，集資捐建養育院。專收孤貧幼童。視其質地，上等者讀書，分送學堂。中下等留院，分別學習精粗工藝。以養以教，在省會設立始基。苟能各府縣踵而行之，亦善政也。聞日本東京養育院，岡山孤兒院，章程甚善。並有學校法家庭法兩種。本大臣在彼就醫，匆匆未及往觀。其如何籌款，收養辦法，幼童學習工藝，何時相宜，尤須切實調查。各項分別種類登記。倘欲暫用日本教習，薪資若干。茲因該員奉端督帥札飭赴東，考察醫學。本大臣亦擬在上海試辦醫學堂醫院，以重衛生。所有考察各節，自可並稟本大臣，以資採取。至東京養育院，並應前往查明，繪圖立說，明晰稟復，是爲至重。除發給日本金幣壹千元，以五百元代購醫藥有用之新書，以五百元作爲該員川資，並札飭丁福保知照外。合行咨明貴大臣，請煩查明，隨時照料施行。須至咨者。五月二十日，乘山口丸赴日本。二十七日抵橫濱。陶君念鈞，薛君劍峯。楊君高百，在岸上相候已久。故鄉老

友，闊別經年。道左周旋，彌形親密。遂同至東京本鄉館。至公使館遞咨文二通，及盛宮保與胡公使書，其書云，敝門生同郡丁福保，中西兼貫，算術醫學，尤其專長。著述各書，風行海內，其施治確有見地。迥非空言學理者可比。現由午帥派往日本考查醫學。弟處前經發起蘇州貧兒院，甫當開辦。一切宏綱細目，亟宜效法東鄰。茲囑該生順道考察。風聞東京養育院，岡山孤兒院，規模條理，最爲精美完備。務乞隨時指示，俾有遵循。並請飭員導引參觀，是所至感。五月十六日，由正金銀行匯上日幣壹千元，請察收，轉付該生應用。恃愛累瀆，當荷恕原。專此敬請助安。統希惠照云云。錄此，誌知己之感也。游日比谷公園，上野公園。連日買新舊書籍藥品千餘金，參觀千葉醫學校，小石川養育院，訪青山胤通博士。參觀帝國醫科大學，由醫學博士二村領次郎君導觀。又入醫科大學附屬醫院，參觀解剖室，愛克司光線室，外科及內科診察室，入鏡檢室。又往青山醫院，帝國腦病院，胃腸病院。繼至上上野公園帝國圖書館，閱鈔本櫟窗類鈔。內載醫事甚詳。前列醫政一門，上自周禮醫官。以乞近代。並載大清律例，醫生職位，庸醫殺人，及配藥不當，治以何等之罪。逐段附以論說，皆精確詳明。惜此書不傳至中國。又閱和漢醫請願之理由。內載漢醫學校課程表。自一年至四五年級，如內科外科婦人科小兒科等，各隨年級分授。其教科書皆爲漢醫所應用者。至傳染病研究室。赴岡山，調查岡山孤兒院。皆別有記。

遊南京

民國二十二年癸酉年六十歲九月廿一日。赴南京，往西華門內建設委員會。稚暉先生

及仲英先生約遊五洲公園，方孝孺祠，無錫同鄉會，江蘇教育經費管理處等，約十餘處。晚與張靜江先生談佛學及素食甚久。又晤李石曾先生。廿二日，稚暉先生偕仲英先生約遊各處，先謁中山陵，建築偉大，可爲中國陵寢第一。今日爲故行政院長譚延闓先生逝世三週年紀念日，故赴靈谷寺，參觀譚墓舉行紀念會，又赴中央體育場，參觀全國運動會。又赴湯山，參觀溫泉三處。在張靜江先生別墅中稍憩，墅有溫泉浴池二所，遂浴焉，又游陶廬，遂返，廿三日稚暉先生偕余回上海。

第五章 南洋醫科考試

生人之大命。寄之於醫師。醫師之果能擔保人之大命與否。人固不得而知也。卽有確知其人無擔保人命之學之識。亦斷不能禁之使不爲醫師也。然則選擇醫師之學識。干涉醫師之准行與否。是惟政府之責任政府之權力耳。故政府宜萃通國之醫生而試驗之。其試驗及格者。給以文憑。准予行醫。是卽代齊民而任選擇醫師之責也。修律大臣奏定法典草案第二百九十六條。凡未受公署之許可。以醫爲常業者。處五百元以下罰金。是卽干涉醫師之權力也。歲戊申五月。兩江總督端制軍有考試醫生之舉。分作五等。曰最優等。曰優等。曰中等。皆給以文憑。准予行醫。曰下等。不准行醫。許其學習。待學優時再行考試。曰不列等。勒令改業。不許學醫。法至善也。今歲四月。余赴金陵投考醫學。幸得最優等文憑。旋奉端制軍盛宮保檄赴日本。爲考察日本醫學專員。回國後。同人之詢問醫科考試題。及場中應試文者。先後踵相接不絕。余遂以應考醫學之作。付諸梓人。以代問答

鈔寫之勞。其題首論中西脈學之得失。次論中西藥學之異同。次論古人之用麻醉藥。次論愛克斯光線之功用。次論中西鍼法。次論鼠疫病因療法。次論說文愬字以證知覺屬腦之說。其問題皆辨析精微。足資啓發。可爲考試醫學之程式。尤爲行醫者之所宜究心也。或曰。是刻也。猶沿科舉時代試卷之陋習。是亦不可以已乎。余曰誠有是。嘗見日本之醫術開業試驗問題答案集。刊行者多至數十百種。余此編殆其流亞歟。趙宋時。考試醫學之制。其命題有六。案宋史。醫學初隸太常寺。至元豐間。始置提舉判局。設三科以教之。常以春舉行考試。崇甯間。改隸國子監。其考試法。分爲三場。迨淳熙中。又稍變其制焉。當時考試之作。謂之程文。今所流傳者。有太醫局程文九卷。收入國朝四庫全書。其此編之導師歟。莊子曰。呼我爲馬者。應之以爲馬。呼我爲牛者。應之以爲牛。世之人其以此編爲太醫局程文也可。爲日本醫術開業試驗問題答案集亦可。爲科舉時代之試卷更無不可。仁者見之謂之仁。智者見之謂之智。命名本無一定。其見淺見深之量。各隨其人學問之廣狹以定之而已。

宣統元年己酉七月下旬無錫丁福保仲祐識

(問)內經論脈有三部九候，至晉王叔和，始以兩手之寸關尺，候五藏六府，後世因之，而西人候脈，則以中醫分配藏府爲妄，其得失奚若。

素問三部九候論。爲吾國論脈之鼻祖。至晉王叔和。始以兩手之寸關尺。分配五藏六府。而立左心，小腸，肝，膽，腎。右肺，大腸，脾，胃，命門之說。王太僕，楊玄操，遂據之以釋經文。繇此以還。診家之學說。大都附會支離。如鼯鼠入郊牛之角。愈入愈

深。而愈不可出。誤後學而墜良材者。已數千年於茲矣。國朝道咸間。英國醫士合信氏有言曰。中國所分三部九候。實難憑信。如謂按寸而知病在心肺。按關而知病在肝脾。按尺而知病在腎。決無此理。蓋週身血管。皆由心系總管而出。散佈四肢百體。流行貫通。豈兩手寸許之管。五藏六府。遂盡繫於此耶。西國每剖驗兩手脈位。見脈管大如雞翎。循臂而上。漸上漸大。上至頸項。卽與頸中血管通連。直達心臟而止。並不與他臟相屬。何以知各臟之脈。必現於此耶。且直通一管。何以知三指分部。必不紊耶。故謂一脈可驗週身之病則可。謂某部之脈獨決某經之病則不可。此西人以中醫候脈。分配藏府爲妄之說也。王氏以三部九候。分配藏府。其說固非。而吾國古來相傳之診脈法。以歷數千年之經驗而得者。其說固未嘗非也。合信氏謂不可以某部之脈。決某經之病。其說雖是。然僅知一脈可以驗週身之病。而不知與心臟病有密切之關係。其說亦未爲完全也。近世之論脈者。先言脈搏之至數。次言脈搏之調節。次言個個脈搏之性狀。（脈搏之來，如波浪之動，故云個個，）分爲三類。與合信氏之說相提並論。其得失昭然若揭矣。所謂脈搏之至數者。先於無病人。每一分時。計其脈息搏動之數也。然脈搏之多少。有因年齡男女等而別。未可一概論耳。如嬰兒在第一年內者。每一分時。脈搏有一百十四三至乃至一百二十三至。十歲至十五歲時。自九十至乃至七十六至。二十歲前後至五十歲時。其平均爲七十二至。老年時則稍稍增加。而達於八十至。此關於年齡者也。照上之數。女子每比男子多七至或八至。此關於男女之性者也。身體之長大者。每減少一二至。此關於身之長短者也。日中及夕時。脈數增加。朝時則減少。其最少數與最多數。互相比較。每

十至內外。達於二十至者亦鮮。此關於晝夜之別者也。易平臥而爲坐。易端坐而爲立。其脈搏之數必增加。凡健康男子之空腹時。則爲六十六至。坐則爲七十一至。直立則爲八十一至。此關於體位者也。攝取多量之熱飲食物後。在一二時內。其脈搏之數必增加。疾走及體操等時。或驚愕恐怖喜悅愁傷等時。其脈搏之數亦必增加。此關於食物之攝取。身體之運動。精神之狀態者也。此爲生理上之脈搏。而關於病理上者則又有進。體溫若在攝氏表三十七度以上。則體溫每增一度。其脈搏之數。亦加八至。此亦爲大略之均平數而已。往往因其熱性病之本性。及患者之年齡。心機之強弱而異。如患腸室扶斯。(傷寒)而無併發症時。以脈搏對於熱度之數而計算之。則熱高一度。而脈之增加不及八至。謂之比較的遲緩。如患肺炎及膿血症。或急性粟粒結核者。其體溫高一度。而脈之增加。過於八至。謂之比較的頻數。故體溫增加一度。脈搏增加八至。言其常非言其變也。又有腦疾患之迷走神經麻痺。(如腦底腦膜炎之末期,)及心臟疾患之瓣膜障害。(除大動脈瓣孔狹窄)或患心囊炎。急性心內膜炎者。必現數脈。患心臟衰弱。心臟麻痺。(如虛脫)或諸般之貧血狀態。(如萎黃病)或官能的神經疾患。(如神經性心悸亢進,心胸狹窄痛,發作性心悸急速症,排在獨氏病者,)以及遇疼痛恐怖狀態者。亦必現數脈也。反於數脈者。則爲遲脈。疾病之現遲脈者。約有八種。脈管硬化症及脂肪心臟。一也。急性心臟擴張。二也。重篤之飢餓狀態。(如食道狹窄,幽門狹窄,)三也。在大動脈系統內。減少強度之血壓。(如大失血等)四也。因腦疾患而迷走神經受刺戟狀態。(如急性腦膜炎,腦腫瘍,腦溢血,腦水腫等,)五也。有患黃疸病之各種原因。(如胃十二指腸加答兒,肝臟

癌腫，肥大性肝臟硬化症等，）六也。由於中毒症狀。（如鉛中毒。酒精中毒等，）七也。間有因神經衰弱，或歇斯的里。（古名藏躁）八也。脈搏之至數。有關於藏府者蓋如此。所謂脈搏之調節者。謂無病人之脈搏。有調有節。相尋而來。即整等脈也。然於生理上之狀態。有失其調節者。每在神經性人體之精神興奮時。及深呼吸時見之。（深吸氣時其脈速，深呼氣時其脈緩，）脈搏之失其調節者。謂之不整脈。又謂之不等脈。現此脈者。其疾病約分三類。一為冠狀動脈硬化症。心筋之脂肪變性。患急性傳染病之心筋衰弱等。二為煙草及咖啡等之中毒。為心臟神經節之疾病。三為患腦膜炎之心臟衰弱。又有脈搏之調節雖異常。而尚有一定之正規者。如正整之脈搏。在一定數持續之後。忽而缺一脈波。此因心臟之收縮，雖有規則。而其收縮力微弱。不能使之傳達於末梢動脈故也。此謂之間歇脈。又謂之缺脈。缺脈者。因心臟缺收縮之作用而生也。脈搏之一大一小相間者。謂之交遞性脈。脈搏每二至三至之後。為一定之間歇者。謂之二脈搏。或曰三搏脈。當深呼吸之終。而脈搏微小。或竟缺如。至深呼吸時再現出者。每於患癒着性心囊炎。併發肺脈性縱隔心囊炎者見之。謂之奇脈。脈搏之調節。有關於藏府者又如此。所謂個個脈搏之性狀者。分為大小，緊張，速度及重搏是也。大脈從心左室之肥大。（除大動脈孔狹窄，僧帽瓣閉鎖不全，及脈管硬化症，）而來。小脈則現於心臟衰弱。僧帽瓣孔狹窄。大動脈瓣狹窄。大動脈瘤。及諸般之貧血狀態等症。動脈內血壓之現於動脈壁者。吾人可以診知其性狀。而由其緊張之強弱。分為硬脈與軟脈二種。有諸般之心臟衰弱症者。則現軟脈。患鉛疝痛，腦膜炎，腦溢血，及萎縮腎等症。而呈心臟之肥大擴張者。則現硬脈。脈波之

上行及下行。謂之運動之速度。一脈波達於頂點而下行疾速者。謂之速脈。每於患大動脈瓣閉鎖不全。諸般之貧血狀態者見之。而脚氣症亦有現此脈者。脈波達於頂點之後而下行遲緩者。謂之遲脈。每於患脈管硬化症。大動脈瓣孔狹窄。鉛中毒腹膜炎者見之。一脈搏達於頂點之後。當下行時而復生隆起者。謂之重搏脈。每於患腸室扶斯。慢性衰憊性疾患。(結核貧血血液失亡爲尤甚)者見之。個個脈搏之性狀。有關於藏府者又如此。據近世之學說。則知脈搏不僅可以驗週身之病。各藏府之病。亦未嘗不可以驗之。特不可強分寸關尺以分配藏府耳。以王叔和較合信氏之說。固王氏失而合信氏得矣。若以今之學說證之。合信氏亦未必無失。要之脈學古疏今密。古拙今巧。非今人之才力。勝於前人也。有古之疏且拙者以爲基。而今之巧且密者。遂緣是以起。由合信氏之時以觀王氏。亦猶之據今之學說而視合信氏也。然則昔之以爲得者。今人旣以爲失。而今之以爲得者。又安知後人不以爲失耶。學說以研究而日新。新者主之。舊者奴之。方可與世界學者相見於文明之壇。又烏取夫顛已守常。姝姝焉自悅其故迹。終古而不化哉。

(問)中藥辨氣味，西藥辨質，質與氣味分別何如。

古者民有疾病。未知藥石。炎帝神農氏。始辨別草木。嘗其氣味。而作方書。氣者指寒熱溫涼而言。謂之四氣。味者，指酸，苦甘辛鹹而言。謂之五味。寒者宜溫。熱者宜涼。此一定之理也。肝苦急。(苦者猶言惡也，違其性故苦，)急食甘以緩之。肝欲散。(欲者從言好也，遂其性故欲，)急食辛以散之。以辛補之。以酸瀉之。心苦緩，急食酸以收之。心欲軟。急食鹹以軟之。以鹹補之。以甘瀉之。脾苦濕。急食苦以燥之。脾欲緩。

急食甘以緩之。以甘補之。以苦瀉之。肺苦氣上逆。急食苦以泄之。肺欲收。急食酸以收之。以辛瀉之。以酸補之。腎苦燥。急食辛以潤之。腎欲堅，急食苦以堅之。以苦補之。以鹹瀉之。此中藥辨氣味之說也。近百年來。東西洋化學日益發達。以各藥品分晰之。至分之無可分。晰之無可晰。化爲各種原質而止。以某某原質之某分子數相化合。則成某藥。知某藥含有某原質。或作用於神經系而爲麻醉藥。或作用於循環系而爲興奮藥。或作用於呼吸系而爲祛痰藥鎮咳藥。或有退熱作用。利尿作用。瀉利作用。收斂作用。殺蟲作用等。條分縷析。至爲詳備。此西藥辨質之說也。辨氣味之法。創於上古。有理想而少確效。其法粗疏。辨質之法。創於近世。本化學而多實驗。其法精密。此辨質與氣味之所以分優劣也。吾不禁因之而有感矣。近來西藥之勢力。日益擴張。設一旦盡用西藥。則吾國之藥物。幾全廢棄。而外人擇吾廢棄之藥。稍加製鍊。增十倍之利。仍售諸吾民。則每歲漏卮之大。何可限量。推其原理。中藥之所以失信用者。非藥之無用。乃未嘗化其原質。僅辨其氣味。而誤解藥性之所致也。福保不揆擣味。少習藥物。沈研鑽極。十有餘載。始知本草之踏駁。非重加刊定。詎可通行。略發其凡。約有六端。如石膏，秋石，珍珠，赤石脂等。毫無功用。不堪入藥者爲一類。人參稍有健胃之益。燕窩略有滋潤之性。價昂而功用甚少者又爲一類。大黃僅知爲瀉劑。而不知少食則健胃。麻黃僅知爲發表。而不知多食則利尿。古人僅知其功用之一半者又爲一類。遠志之成分。與攝藥瓦。（辛衣格）相似。宜列入祛痰劑。而古人以爲補藥。黃連之成分。與龍膽草相似。宜列入苦味健胃劑。而古人以爲瀉火清熱藥。此本草全誤其功用者又爲一類。熟地內含鐵質最

多。檳榔治瘡疾有特效。能代金雞納霜。此東西洋之藥物學家。尙未知其功用。爲吾國之所特有者又爲一類。百部能減氣管支之興奮。爲鎮咳之要藥。曼陀羅花及茛利根。有麻醉神經之功用。爲止痛之要藥。此種學理。已略見於古書。而今人不敢常用。宜揭出之以保存國粹者又爲一類。福保擬用化學辨質之法。將中藥之不堪入藥者去之。功用甚微者抑之。全誤其功用者糾正之。西人未知之藥物。爲吾國所特有者發明之。略見於古書。而今人不敢用者，光大而昌明之。凡中藥之已見於東西洋之藥物學書。而已晰其成分者。分別部居而薈萃之。易辨氣味而爲辨質。亦未始非吾國藥物學進化之一大關鍵也。

(問)玉堂閒話稱高駢時，有術士善醫大風。置患者於隙室中，飲以乳香酒數升，則惛然無知，以利刀開其腦縫，挑出蟲可盈掬，長僅二寸，然後以膏藥封其瘡口，別與藥服之，而更節其飲食動息之候，旬餘瘡盡愈，纔一月，眉髮已生，肌肉光淨如不患者，此治法與西醫同，惜世不傳，試以西法詳闡其證治。

按術士飲患者以乳香酒數升。以刺刀開其腦縫。患者懵然無知。此法與西醫嗅患者以哥囉方相同。卽所謂全身麻醉法也。如菘蓉，曼陀羅花，番木鱉，雙鸞菊之類。皆足以令人麻醉。而奪其神機。故起心神錯亂。瞳孔散大。煩渴引飲。不知人事之狀況。若多服則死。凡割肉刮骨。皆爲必用之藥。吾國古人善用此法。試以故實證之。後漢書華陀傳云。疾發結於內。鍼藥所不能及者。令先以酒服麻沸散。既無所覺。因剝破腹背。抽割積聚。若在腸胃。則斷截湔洗。除去疾穢。既而縫合。傅以神膏。四五日創愈。桂海虞衡志云。曼陀羅花，盜採花爲末。置人飲食中。服之皆醉。梅元實藥性會元云。曼陀羅花，與川

烏，草烏合末。卽蒙汗藥。（蒙汗，見本草綱目泉水條，及七修類稿水滸傳等書，其義未詳，或云蒙汗隱語，以其害人，故諱其名也，說見敗鼓錄中，）本草載茺利根。以酒磨服一寸。則昏迷一日乃醒。二寸二日。三寸三日。紀曉嵐云。閩女飲茺利佯死。與私夫共逃。則茺利亦可以醉人。張介石資蒙醫經云。蒙汗一名鐵布衫。少服止痛。多服則蒙汗。其方鬪羊花，川烏，瓦龍子，自然銅，乳沒，熊膽，朱砂，麝香，凡九味。研爲極細末。作一服。用熱酒調服。乘飲一醉。不片時。渾身麻痺。陳士鐸石室祕錄碎治法門云。先用忘形酒。使其人飲醉。忽忽不知人事。任人劈破。絕不知痒痛。取出蟲物。然後以神膏異藥。縫其破處。後以膏藥貼敷一晝夜。卽全好。徐以解生湯藥飲之。如夢初覺。而前症頓失矣。資蒙醫經石寶祕錄所載。皆屬華陀遺法。可以備參考焉。然華陀時之麻沸散。高駢時之乳香酒。豈異名而同物歟。抑別有藥物加減於其間歟。欲考其遺方。而醫學家無有知者。嗟乎。吾國醫學之退化。不用麻醉藥者。亦已久矣。福保嘗本西人麻醉劑之原理。而以中藥代之。用曼陀羅花七分。草烏頭，白芷，當歸，川芎各二分。共爲細末。空心服之。須臾亦能心氣昏暈。手足麻痺。卽以利刀開其腦縫。亦懵然無知。凡治跌損脫臼。及一切外症之欲用手術者。宜令病人先飲此藥。若以西醫哥囉方證之。其原理。其效果。無不一一相同也。故謂之近世之麻沸散也可。謂之近世之乳香酒亦無不可。案大風又名大麻瘋。又名天刑。卽癩病也。其原因爲癩黴菌。有斑紋癩，結節癩，麻痺癩三種。係經過極短。豫後極凶之傳染病也。東西各國。尙無治法。則我國古術士之醫大風。豈後人附會其說耶。抑果有神奇特效之藥。歷數千百年來所失傳耶。古人不作。稽考無由。不禁爲世之

患斯疾者憮然惜矣。

(問)扁鵲能洞見五藏癥結，世以爲怪，近日X光鏡，照人洞達表裏，惟金類不能透，西醫以爲取彈子之用，然其照五藏亦略有微影，能研究其功用，以之治他病否。

X光放射線所發出之螢石光。能透過諸物體。因諸物體之透過。其疎密各不相同。遂生陰影像。乃以此陰影像。攝影於寫真版。醫學家據此學理。實用於人身。遂爲診務上之一助。蓋以物體有透過充分者。有透過不充分者。有不透過者三種。凡不透過及透過不充分之物體。皆留陰影於寫真版。所以彈子入人體而不知其處者。可借X光取出之。此外如誤嚥物體入胃內。亦可以X光放射其胃部。視物體之陰影之所在。而後用手術取出之。又如骨骼之種種疾患。亦可以洞達其病理。凡此皆近世醫學上之所應用也。雖然近時因X光線應用之日繁也。屢有起皮膚炎及火傷者。此火傷亦與普通之熱湯或固形物體所起之火傷無異。其火傷分急性慢性二類。急性X光線之火傷。初起時毫毛被燃。次則皮膚充血變。爲赤色。浸潤而搔癢。又次則皮膚疼痛。發生水泡。漸成潰瘍。終則真皮變壞疽而剝落。慢性X光線之火傷。皮膚乾燥易裂。且有色素沈着於其部分。多生小血管。障害爪甲之發育。所以醫生研究X光之功用。稍一不慎。其流弊必使病人患火傷無疑。曩時曾有以X光照肺病及諸內臟者。雖使病人屢患火傷。而究不能有確實之效果。今已廢而不用矣。惟X本爲未知之義。故在代數學中用以代未知數。此光線而以X名之。則以此光之妙用。尙屬未知。正待後人之研究也。扁鵲飲上池水。能洞見五藏癥結。豈當日已有X光之發現耶。抑秦漢時好言纖緯神仙鬼怪。傳者之附會失實耶。何荒誕不經而如扁鵲傳之所云也。今欲

以X光而證扁鵲之洞見垣一方人。諒哉其難之歟。

中西鍼法療病論

帝王世紀曰太昊制九鍼。又曰黃帝命雷公歧伯教制九鍼。內經曰虛實之要。九鍼最妙者。爲其各有所宜也。此乃用鍼法治病之始。至後漢。有鍼醫名郭玉。其師曰程高。程高之師曰涪翁。見後漢書。繼是以往。晉有甲乙經。宋有銅人鍼灸經及鍼灸資生經。元有扁鵲神應鍼灸玉龍經。明有鍼灸問對等。皆詳論鍼法之書也。考西國古時亦有鍼法。作爲病人放血之用。然僅知放血一端。而不知鍼法與末梢神經病及胃腸病。有密切之關係。其用甚狹。故廢而不用者久矣。蓋西人之於鍼法。知其粗而遺其精。不特廢而不用。甚至有懸爲厲禁者。而吾國數千年來。論鍼法者詳且備矣。如三叉神經痛。(宜鍼承漿，百會，後頂腦戶，風府，神庭，上星，曲左，臨泣，本神，迎香，禾竅，下關，四白，客主人，額竅，攢竹，陽白，)肋間神經痛。(宜鍼患部)坐骨神經痛。(宜鍼臀部及大腿之後面，及胞盲，秩邊，承扶，殷門委中，崑崙，三里等，)顏面神經麻痺。(宜鍼神庭，臨泣，迎香，禾竅，下關，客主人，頰車，聽會，陽白，)偏頭痛。(宜鍼百會，風池，列缺，上星，頰厭，本神，迎香，巨竅，下關，頰車，頭維，客主人，曲差，五處，天柱，)腦膜炎。(宜鍼啞門，風府，風門，心俞，印堂，百會，人中，中衝，大敦，隱白，)腦出血。(古名卒中，宜鍼風池，百會，醫風，肩髃，三里，頭維，懸顛，頰厭，肩井，客主人，三陰交，陽陵泉，曲池，風市，行間，胃崙，完骨，委中，人中，申脈，天樞，上

市，會谷，）歇私的里。（古名臟躁，宜鍼中極，關元，氣海，中脘，巨闕，瘕門，大橫，日月，心俞，脾俞，腎俞，關元俞，胃倉，幽門，肩井，）等。關於神經病者。宜早以鍼法治之。可收速效。又如急性或慢性之胃加答兒。（急性胃答兒，古名食傷，即胃內皮發炎，慢性者，古有淡飲，痰飲，溢飲等名，宜鍼上脘，中脘，巨闕，不容，承滿，期門，肝俞，膽宜，意舍，大杼，）胃擴張。（鍼（之部位，同胃加答兒，）急性或慢性之腸加答兒。（即新泄瀉與久泄瀉，宜鍼腹部有痛之部，及頸部後方，）疝氣痛。（宜鍼章門，期門，日月，府舍，腹結，胃俞，腎俞，大腸俞，膀胱俞，胃倉，）黃疸。（宜鍼上脘，中脘，建里，梁門，太乙，天樞，日月，肝俞，胆俞，隱白，脾俞，胃俞，）腳氣。（宜鍼水粉神道，會陰，偏歷，天樞，大巨，大腸俞，胞骨，）關節癱麻質斯。（古名白虎歷節風，又名風濕骨痛，宜鍼百會，曲池，三里，肩髃，合谷及患部，）氣管支喘息。（金匱謂之上氣，素問謂之喘息，宜鍼幽門，上脘，巨闕，曲澤，中脘，陰都，中府，天突，及頸部與背部，）等病。鍼之。亦可獲奇效也。凡此皆西人之所未嘗研究者。其輕視夫鍼法也宜矣。考日本之鍼科家。皆能明解剖生理病理診斷內外諸科。故能將新舊學說。融會貫通。以發明鍼學之神奇。而吾國之爲鍼師者。大抵以薙髮匠任之。漫無學識。往往鍼及患者要害。因而致死。更不問其病之可鍼與否。概以鍼刺之。是大謬也。若虎列拉。（真霍亂）赤痢，腸窒扶斯，發疹窒扶斯，痘瘡，實扶的里（爛喉痧）等。爲劇猛之傳染病。皆忌鍼刺。又如丹毒，酒客，勞動過度，憤怒者，熱度高者，飽滿，飢餓，流汗，煩渴，衰耗，驚怖，及下車乘船之後，亦不可施以鍼刺也。而今之爲鍼科者。茫然無知。有

鍼刺一患傳染病者。因不知消毒。再接再種於他人者。或鍼端多有細菌。刺腹部則發腹膜炎。刺胸部則發肋膜炎者亦有之。其爲通人之所詬病也固宜。嗚呼。若論古人鍼法之精邃。則西人亦瞠乎其後。論近人鍼法之粗劣。則反不如西人之僅知放血。或廢而不用之爲愈也。古人不作。國粹淪亡。可勝慨哉。

說文𠂔字兼心與𠂔言與西醫知覺屬腦有合說

𠂔思晉切。說文云。頭會腦蓋也。象形。魏校曰。𠂔頂門也。方書云。頂中央旋毛中爲百會。百會前一寸半爲前頂。百會前三寸。卽𠂔門。心息林切。說文云。人心土藏。在身之中。象形。博士說。以爲火藏。荀子解蔽篇曰。心者形之君也。而神明之主也。素問曰。心者君主之官。神明出焉。按古人造字之本義。凡象形皆獨體字。形聲。(凡字半義者，取其義而形之，半主聲者，取其聲而形之，故曰形聲，鄭衆作諧聲，諧洽也，非其義，)與會意。皆合體字。因獨體不足以見其義。故必合數體之意以成字也。會意之合體。以義爲主。形聲之合體。以聲爲主。聲或在左。或在右。或在上。或在下。或在中。或在外。亦有會意而兼形聲者。古人造字之體例如此。凡習小學者類能言之。夫𠂔與心。皆象形之獨體字也。以𠂔心二獨體字合而爲𠂔。其意可以見矣。六書總要曰。𠂔念也。慮也。釋理爲思。說文云。𠂔睿也。从心𠂔聲。𠂔頂門空空。自𠂔至心。如絲相貫不絕。此卽會意而兼形聲字也。釋說文造字之本意。與西醫知覺屬腦之說。若合符節。誰謂古人不知腦之功用哉。試以古人之學說證之。素問曰。人有髓海。又曰腦爲髓之海。又曰。諸髓

皆屬於腦。金正希曰。人記性皆在腦中。汪說菴曰。今人每記憶往事。必閉目上瞪而思索之。王勳臣曰。小兒無記性者。腦髓未滿。高年無記性者。腦髓漸空。凡此皆與西醫知覺屬腦之說。可互相發明也。福保弱冠時於許氏說文。雖肄業及之。而以生平於小學致力甚淺。不敢有所造述。因辱承明問。輒復貢其膚末。乃贅說如右。

附錄各報記事

中國考試醫學之創舉（錄戊申八月第三期廣東醫學衛生報）

江督端午帥在中西醫院特開研習醫學專科。先招集考試。所定考試醫生章程如左。

一醫界範圍甚廣。今以地方行政所關。先就江南省城立有牌號。（即招牌）及定有脈金之醫士。一體考選。其有知醫而不問世。只與戚黨酬應者。及曾遊學醫科。得有文憑者。考否聽便。不在此限。

一各醫學統限於五月十五日以前。赴提學使署報名投考。將姓名牌號籍貫。及所業何科。現居何處。逐一註明。聽候定期考試。屆時由提學使牌示通知。其現未懸牌。亦願與考者。一體報名。

一各醫生所報專科。如內科外科女科幼科之類。以及產科痘科眼科牙科等。於某科之中。專擇一事者。是猶大學選科例。亦可聽其擇報。凡報一科或兼數科者均聽。

一考試出題。祇就醫學普通知識所必有者。發為總題。但期明於醫術。並不苛其文藻。其餘發問數條。各就本科難易不等。亦不限令全答。取覘程度高下。以定等差。

一考試各醫生。按照學堂章程。分爲五等。其最優等優等者。各給應得文憑。並記名候給醫學差委。中等者給予中等文憑。以上均聽其懸牌行醫。不懸者仍聽其便。其下等及最下等者。不給文憑。不准行醫。（注意）

一經此次考選之後。各將所得某等文憑。註明於牌上。凡無文憑者。不得懸牌。倘此次未經考試。或考後補習有進者。應候再考。如有混行懸牌者。由地方官隨時查禁。

按個人有病。必賴醫生之療治。然醫生之果有學術。能治病與否。則非個人智慮所能知。蓋醫爲專門之學術。必需有醫學上之智識。乃能判定。是故國家必代個人考驗醫生之效力。發爲保證。以聽個人之自擇。未有稱爲慎重民命。而任庸醫遍市者。吾中國尙無干涉醫生之例。從前施廣府雖曾考試醫士。然不過採風問俗之意。並無實行干涉之條。端督此舉。實爲創舉。特恐京兆一去。被擯者旋即復業耳。

南京考試醫生（錄戊申七月第二號紹興醫藥學報）

江督以醫學一科。有關生命。特札飭甯提學陳子礪學使。凡在省垣行醫者。須一律考試。以定去取。日前陳學使遵卽錄札牌示。令業醫者開具姓名年籍牌號。先行報名。聽候示期傳考。聞其考試之法。擬用病症方藥古今人治法不同之處。設爲問題。令其條對。班次分爲五等。考取中等以上者。始給文憑。下等者暫時禁止行醫。并擬於中西醫院附設一醫學研究所。仍令考取中等以上各生。入所講求。以冀深造。其考不及格而願入所研究者亦許之。如此則既取者精益求精。未取者亦可相觀益善云。

考試醫生再誌

甯垣考驗醫生。提學使司陳子礪方伯因報名入衆。展限五月十五日爲止。現已集有八九百人之多。督憲此舉。原爲昌醫學保民命起見。考時第觀學術。不以文藝爲先。所出之題。就病症方藥古人治法不同之處。疑難奇僻之病症。及游移爭競之理說。每科擇要設爲問題數條。能對若干條。卽判爲若干分數。仍以六十分爲中等。於寬假之中。有一定準繩。醫術重閱歷。試後發往中西醫院試驗。彙其醫案，方藥成績，報告，與試卷合校。再於中西醫院中附設研究所。均於考定後察酌舉行。考時極爲嚴肅。學憲連日住宿於高等學堂中。聞須將試卷校定後始回署云。

江督派員考察日本醫學（錄已酉五月第十期醫學衛生報）

四月十八日。無錫丁君福保。俞君鼎勳。奉江督札開。略謂爲札派事。照得世界文明愈進。醫學之發明愈精。所有戶口之增殖。種族之強盛。人民生命健康。皆惟醫學是賴。查有無錫丁生福保。俞生鼎勳。於中西醫學。極有研究。堪特派爲考察日本醫學專員。凡日本之各科醫學。及明治初年改革醫學之階級。與日人所錄用之中藥。以及一切醫學堂醫院之規制課程。均應一一調查。以爲吾國振興醫學之助。除咨行外。合行札派。札到該生等。卽便遵照辦理云。

當隋大業四年。日本遣僧惠齋惠光及醫師福因惠日等。留學我國習醫術。至唐武德六年。始歸國。前後修業共十六年。此事在日本書記。言之甚詳。爲日本人留學外邦習醫術之始。吾隋書僅言其來學佛法。唐書則並不紀其留學何藝。徒云遣學生留朝肄業而已。斯時我醫術正盛。大著述如巢氏病源候論孫氏千金方等。均於是時出世。千年

以來。日人承用皇漢醫術。未嘗或改。乾隆間始有和蘭醫之輸入。降及明治。乃競尙獨逸醫學。而漢方醫之勢力。直持續至明治二十四五年。改革不可謂不難。今江督特派員調查一切。意欲以日本醫學改革之成績。爲吾國欲行醫學改革之模範。意甚盛也。蓋日本醫學之歷史。與吾國最相近云。

考察日本醫學專員回滬（錄己酉六月二十八日申報）

南洋考取最優等醫師丁福保。優等醫士俞鼎勳。奉前江督端午帥。派赴日本。爲考察醫學專員。昨已回滬。聞此次在日本，考察極爲詳細。著有日記一大冊。內有帝國醫科大學，青山腦病院，胃腸病院，順天堂醫院，傳染病研究所等各種章程。凡各醫學堂醫院辦法，及建築法，言之甚詳。足爲吾國取法。又聞購買醫書至七八百元之多。爲醫界從來未有之盛舉。未始非吾國醫學改良之起點也。

第六章 詰林精舍

後漢許慎，字叔重，五經無雙，譽冠當代，識緯術數，絕口不道。師事賈侍中，紹古文家之絕學。其所著說文解字一書，囊括古今，俯仰宇宙，闡先聖造字之神詣。於天地山川，得方圓流峙之形。於日月星辰，得實闕精明之象。於雲霞草木，得回轉芳菲之容。於衣冠文物，得揖讓周旋之體。於耳目口鼻，得聰察嗅噓之分。於蟲魚禽獸，得屈伸飛動之理。於骨角齒牙，得岐嶷堅剛之勢。體形千變，則字形萬化，可謂窮六書體制之源流，備羣籍雅詁之淵藪，世間萬事，莫不畢載者矣。吾人處數千載後，猶能窺見古人文字之精意

者，惟賴是書之存，此其功真不在禹下也。

吳稚暉先生爲余寫詒林精舍篆書扁額一方，先生跋其後曰，『仲祐先生博精小學，又好禪理，頻年綜貫許氏書爲說文詒林兩巨編，垂惠藝林，比迹儀徵長沙而有餘，顧先生止逃佛隱海市，如慧琳之潛養，以餘力治諸經音義，其韻致相髣髴。額小築曰詒林精舍，聊以寄意，其友吳敬恆爲作篆張之』。

蔣竹莊先生詒林精舍記曰，『滬濱商肆櫛比，交通頻繁，至其地者，終日車聲機聲，震耳欲聾，惟西北隅較僻靜，宜於居宅，吾友丁君仲祐，築精舍於其間，名之曰詒林，詒林曷爲名，則以仲祐編輯說文解字詒林於此也。祐輯此書，以三十餘年之力，廣搜治說文者之學說，依大小徐之原本，每字爲一條，而以諸家解釋，附隸其下，俾讀者檢一字而得數十家之義，便莫大焉，初板刊印，亦既紙貴洛陽，馳譽海內，無俟余之颺縷矣，夫學者之著述，大率不出二類，一則發表自己之心得，一則整理舊聞，同條共貫，俾讀者得省日力，犁然有當於心，是卽孔子之述而不作，其功較前者尤大，仲祐之作，此物此志也。精舍在仲祐住宅之旁，凡三楹而層樓，入門，中間爲廳事，東爲客室西爲食室，登樓，則圖書滿架，古今要典咸備，仲祐寢饋其中，鷄鳴卽起，張燈疾書，至午夜不倦，雖嚴冬盛夏，而工作未嘗稍輟，故能成此宏博之鉅著，而詒林補遺百數十卷，又已在屬草之中，嗚呼，何其盛也。舍之頂，規爲平臺，方廣可四丈，登臺眺遠，西及徐匯，東至黃浦，帆檣隱隱，盡在目中，仲祐著書之暇，緩步於斯，飽受日光空氣，故其容顏，老而彌澤，至於攬朝霞，迎素月，春雨秋風，景狀變幻，自然之美，悉萃斯臺，可以取之無盡，用之不

竭，臺之東北隅，闢一靜室，閉戶焚香，默坐其中，則又若老僧之禪關，超然有出世之志焉。仲祐於每來復之首，恆在此邀集親友，談笑爲樂，夕則出糜粥素蔬享客，以示儉而可久，客亦安之，十載以來，習以爲常，余亦恆爲不速之客，覺紅塵擾攘之中，有此清涼之境，賓主歡愉，得未曾有，其在易之需曰，君子以飲食宴樂，其在兌曰，君子以朋友講習，仲祐有焉。夫人世滄桑，數十年或百年而一變，是舍也，奚能獨逃茲例，而詒林一書，則千秋之業，永垂天壤，則精舍之名，亦因以不朽矣。抑余尤有感者，讀書之人，往往不善治生，甚至不能自給，其上焉者，則以孔子謀道不謀食之言自文，下焉者則怨天尤人，潦倒以終其身，比比皆是，此實生民之病態，非爲人之正軌，善乎元許魯齋之言曰，爲學者治生最爲急務，苟生理不足，則於爲學之道有所妨，彼旁求妄進者，及作官嗜利者，殆亦窘於生理者之所致也，君子當以務農爲本，商賈雖逐末，亦可爲也，此其言詢可爲學人之針砭，而余亦未能免乎此也。若仲祐之著述等身，風行一世，用能潤身以潤其屋，一洗向者不能治生之恥，庶幾有合於魯齋之言歟。蔣維喬記

裘葆良先生詒林精舍記曰「古國必讀古書，古書皆古言，與今言異，故必深於吾人之學，乃能以今言譯古言，顧或誤譯已久，歷二千年不之省。清儒起，一文一字一音一義之疑，必博考羣譯，求古言真相，既得，不遽信，又必旁求他證必衆證皆同，不一異，而後信其真，故一義旣明，羣喙皆息，起吾人於九原，亦必自嘆不如也，蓋清儒精研文字如此。吾友丁君仲祐，夙嗜此學，多所發明，近又析取說文解字大小徐本，及清儒治文字學成專書，或散見他書者，按字排比，爲詒林一書，冀以減稽古之日力，惠來學於無窮，書

既成，名其所居曰詒林精舍，屬余爲之記，精舍藏書十五萬卷，爲仲祐著書處，遇星一，輒舉行茶會於其中，迄今十年，精舍已屢易其地，而茶會如故，及期，日將夕，客皆至，風雨寒暑無間，然惟吳君稚暉，時爲主人商定體例，頗有助於詒林云。』裘可桴記

摘錄吳稚暉先生復友人書曰，先生問欲治說文，以何家爲善弟則以爲此非一先生包辦之學，必參稽衆說得其至當，乃爲新式之治學。說文名著，自然以段桂王朱諸家爲勝，但兼購數種，必已費三四十元，不若得一新出之奇書，所謂說文詒林者，止多化數十元，可得四五百種之書，真破天荒之便宜。且不但詒林羅聚衆說於一處，參稽極便，卽如說文，究係字書，按部循讀，必將厭倦。若動輒羅列各家，參互考訂，亦嫌攤書滿案，諸多麻煩。惟取詒林讀之，揭一字而衆證互陳，興味增添，如觀公堂會審，是非曲直，無不畢顯，故能引人入勝，可以消閒。此真變枯燥之字書，爲有味之讀物。在消閒中治學，詒林之功用，真算不小。所以弟在湯山時，勸李任潮先生購讀詒林。近在鼓樓李寓，見篆帖鼎銘，黏陳四壁幾滿。足見已由詒林引誘，漸着說文之迷矣。又據詒林所編索引，欲檢得任何一字，以十秒鐘可以立得。此尤從來未有之快事。惟詒林有此神奇，真治小學者之寶筏，宜乎一再出版，不敷供應。先生能節衣縮食，急購一部，學筭甚儉者不啻暴富矣云云。

前駐日本公使汪衮甫先生曰，說文爲中國最古而最完備之字書，凡欲略知造字之本，因以窺見古音古義者，捨是書末由，有清一代，考證之學極盛，治經者以孳求詒訓爲入德之門，故爲說文之學者，尤視諸經專門之師爲多，其爲書汗牛充棟，窮老盡氣不能徧觀，

往余嘗有志采集清代諸儒治許學之書，汰其繁蕪，撮其精要，爲說文義疏先做焦理堂作孟子正義之法，排比羣籍以爲長編，牽於人事，因循未果，每以爲恨，余讀吾友丁仲祐先生所撰說文詁林，彙聚大小徐及清儒臧玉林以下諸家有涉說文之書一百八十餘種一千餘卷，條分縷析，繫諸許書每字之下，一展卷餘，而衆說咸在，精粗詳略，罔有逸遺，此真余平日夢寐所求，欲發憤自爲而未能者，而仲祐以三十年之力成之，乃歎仲祐爲學之篤，百倍於余，而此後學人治說文者賴此書之成，得以不費日力，博觀衆家，憑籍旣富，決擇斯易，義疏之出，亦將旦暮遇之，則仲祐之所以嘉惠藝林者，甯有涯涘耶。方余作長編時，購求諸家著述，所得善本，不過一二十種，而所費已多，因念若盡購所欲得，非六七百金不爲功，今讀是書，凡余所欲得者無一不備，而所費不及余私計十分之一，用力少而成功多，孰逾於此云云。

前蘇省民政廳廳長胡樸安先生通告中國學會各會員云，會員丁福保先生所編之說文解字詁林，可謂文字學界之大著作，采書一百八十二種，一千三十六卷，其前錢可盧王南陔所未竣功者，至丁先生始成之，予讀其書有四善焉，一、檢一字而各學說悉在也，二、購一書而衆本均備也，三、無刪改仍爲各家原面目也，四、原本影印，決無錯誤也，故無論藏有文字學書或未藏有文字學書者，皆不可不備此書。

于右任先生曰，說文解字，爲研究國學必備之書。自遜清乾嘉以來。關於說文之著作品。不下二三百種之多。學者如欲檢查一字。非編檢各書不可。而單文零義之散見於各家文集及筆記中者。一時尤難檢閱。今丁君編輯此書。合原書一千餘卷，囊括有清一代許氏

之學，匯爲淵海。檢一字而頃刻卽得，得一字而各說咸備。凡古書中之所謂某爲正字，某爲借字，某爲古文某爲異文等，昔人窮老盡氣而不得者，今費半小時卽可得之。所以此書出，不僅集許學之大成。實亦治說文者最便利之捷徑也。

說文原序云，段借者本無其字，依聲託事，令長是也，古今來之小學名家，論段借者無慮數十家，其說大抵牽引支辭，莫知本意，雖擄擻不少，而附會偏多，實無一家能知許意者，余展轉思維，不得其確解，旣而忽有所悟，曰得之矣，得之矣，鄭康成氏與許君爲同時人，其注三體亦引用說文，若以鄭說通許說，必深中事理，因考經典釋文序引鄭氏之論段借曰，倉卒無其字，或以音類比方段借爲之，趣於近之而已。夫倉卒無其字，卽許氏之卒無其字也，或以音類比方段借爲之，趣於近之而已。卽許氏之依聲託事也，惟隸書卒本二字，因形近易誤，遂譌卒爲本，千餘年來之小學家，未審訛文，強爲解釋，致說逾多，而辭益支，茲據鄭說正之，改爲卒無其字，乃犁然有當於人心矣。管子曰思之思之，鬼神將通之，非鬼神之力也，精氣之極也，其吾今日之謂乎。吳稚暉先生以爲令長卽令良之譌文，立說精確，其全文皆詳載於詒林補遺及本書中，大致謂令發號也，引申而爲縣令令長使令法令之令，長，久遠也，引申而爲滋長長幼縣長家長之長，皆轉注也。轉注由於意義，段借由於聲音，二者本絕然不同。或有駁之者曰，譬如講師口言縣令，而筆受者，可書作縣長，或口言縣長，亦可書作縣令，故令長可互相段借，不必改爲令良。余謂此說非是，凡段借者須以雙聲音近音同之字爲之，故曰依聲託事，令長非雙聲音近音同之字也，此不可段借之故一，考漢書百官表，縣萬戶以上爲令，萬戶以下爲長，續漢志，每縣

邑道，大者，置令一人千石，其次置長四百石，小者置長三百石，令與長其石數之多寡懸殊，此不可段借之故二。惟令之與良，詩箋皆言善也，令良雙聲，故可互相段借，如良妻可作令妻，詩令妻壽母是也。良人可作令人，詩我無令人是也。以引伸歸轉注，以音類比方歸段借，如是則轉注段借之界說畫清，其真義始出。學者知此，可判別古今人論六書之謬羈矣。然良之所以改爲長者，實因光，武帝之叔諱良，故以長字代之，蓋良，善也，長亦善也，故可相代。

曩時日本開說文會於東京。羅列說文韻書百餘種，有中國鮮傳本者。精擇著書人，自許叔重以下六家，設木主供祀之，共七位。第一位後漢許慎。第二第三位南唐徐鉉徐鉉。第四至七位清曲阜桂馥，金壇段玉裁，元和朱駿聲，安邱王筠。餘非注全書，不設木主。余深歎其選擇之精。

余作一切經音義彙編，李審言先生書其後曰，琳師所引說文，近於鄙別，與叔重元書不一律。唐人傳寫之本，非如金科玉條。觀辟歷著雨，禽从手，爲之氣盡。仲祐先生雖張此書，請擇其精當者證之，且須圓融其說。詳於小學，略知大義。承公委勘，敢獻瞽說。先生爲千載傳人。卽此刊書功德，接人以柁。中國二十二行省中，欲別覓與先生相偶者，千披萬索，恐亦不得而同也。以詳爲可教，書成卽贈，捐貲不惜者，首南潯劉翰怡京卿，張石銘觀察，南陵徐積餘觀察，貴池劉聚卿參議。今則復有先生。篋中累累，皆諸公所贈也。此音義成，尙求先生依例見餉先爲此要言。勿忘爲幸。小弟李詳記於末葉。時壬戌七月廿二日。

第七章 著述

年來紙貴工昂，印刷艱難，著述興趣，爲之大減，偶翻民國三十一年申報有「丁福保五十年來之著述」一篇，錄之以實我自傳。丁先生七歲開始讀四書，十二歲時就能自閱三國志演義。翌年其兄爲之講解左傳，史記，漢書及文選等，學大進。當時吳稚暉先生稱讚他說道：「福保亦一奇童子，十四五卽通治漢魏六朝數十百家之文」，十八歲時詩名大著，應南菁書院月課，老府宿儒，爲之傾倒。有夜登錫山云：「怪禽呼月上，北斗掛天高」。村居云：「夕陽牛落輓，疏雨燕還家」。豐神雋水，譽盛一時。二十二歲時，肄業江陰南菁書院，光緒辛丑盛杏生宮保在上海設東文學堂，投參者六百餘人，取四十人，他名列前茅，由此習日文文法，復習醫學，化學等，其日文著作有東文典問答與廣和文漢讀法等書。四十四歲時，他藏書已達十五六萬卷，二十年前的夙願亦便償了。

他從廿一歲編宗譜起接着編算學書，醫藥衛生書，國學書等，到現在足足五十年的歷史。大小著述不下三百餘種，概括之可分爲五類：（一）醫藥叢書，（二）說文爾雅等小學（文字學）書，（三）古泉叢書，（四）進德叢書，（五）佛學叢書，內以佛學撮要，心經精義，六祖壇經箋註，佛學大辭典四種流通最廣。其他尚有算學書及道學書多種。三十五歲在上海刊行醫書，自由日回國發行中西醫學報，彙譯醫書愈不輟，名曰丁氏醫學叢書，萬國衛生賽會，都得最優等獎賞。

醫學著述八十三種 丁先生關於醫學方面的著作可分爲好幾類：（一）總類醫學指南，

新醫學六種，普通醫學新智識，家庭新醫學講本，公民醫學必讀，南洋醫科考試問題答案，德國醫學叢。(二)解剖——新撰解剖學講義。(三)生理衛生——丁譯生理衛生教科書，實驗衛生學講本。學校健康之保護，腦髓與生殖之大研究。(四)組織——組織學總論。(五)病理——新撰病理學講義，病理學一夕談，臨床病理學。(六)診斷——診斷學大成，漢譯臨床醫典，診斷學一夕談，初等診斷學教科書，診斷學實地練習法，(七)藥物與處方——藥物學大成，增訂藥物學綱要，普通藥物學教科書，藥物學一夕談，新萬國藥方。(八)傳染病——瘧疾霍亂合編，赤痢新論，赤痢實驗談，新傷寒論。喉痧新論，預防傳染病之大研究。(九)肺病——肺癆病預防法——新撰虛癆講義，肺癆病學一夕談，癆蟲戰爭記，肺病指南，肺病癆之天然療法，肺癆病救護方，肺病最經濟之療養法。(十)神經系病——神經衰弱之大研究。倍氏神經系病學馬氏精神病學合編(十一)皮膚病——加氏皮膚病學，美容法。(十二)雜病——喜氏頸病及胸病施氏喉頭病學合編，人體寄生蟲病編。(十三)外科——外科學一夕談。(十四)兒科——新纂兒科學。(十五)婦科——近世婦女科全書。(十六)胎產——竹氏產婆學，胎生學，產科學初步，妊娠生理篇，分娩產褥生理合編，妊婦診察法。(十七)求孕與避妊——子之有無法。(十八)性病——人類之性病。(十九)看護——看護學，家庭侍疾法。(二十)催眠與按摩——近世催眠術，西洋按摩術。(二十一)攝生自療——怎樣使你身體康健，日光療法，改造中年後之命運法，食物最經濟法，食物與早老，食物療法，衛生延年術，自然健齒法，健康生活叢書，衰老之原因及其預防，最真確之長壽法，老人延年術，實

驗却病法，民衆新醫學叢書。（二十一）中醫書類——國醫補習科講義，家庭新本草，化學實驗新本草，漢法醫典，中西醫方會通，醫界之鐵椎。（二十三）醫學史——西洋醫學史。（二十四）雜類——身之肥瘦法。

以上醫學著述共八十三種。

說文詁林蔚爲大觀 丁先生在南菁書院時，卽擬編纂說文解字詁林，着手三十餘年，於五十五歲時始告成功，搜集各家撰述，百八十二種，千三十六卷，計七千六百餘頁，凡殷虛文字，鼎彝款識，正始石經等，亦各附諸字之下。繼爲補遺七十卷。說文鑰正續篇出版，文選類詁亦問世。說文解字詁林合古泉大辭典與佛學大辭典爲丁氏三大巨著。

先生六十六歲時又輯成爾雅詁林，羣雅詁林，釋文詁林，方言詁林等書。此種工具書，便利學者不少。丁先生之書，專在使人。力圖顯出，并謀溥及，任何學術經先生之統治，無不條理井然，集其大成，示人以入？之捷徑。爲天下後世學者，節省其時日與精神，而以藐躬獨當衝繁疲難之役。此其犧牲主義，難能可貴。

研究古泉，家藏甚富 先生家本有藏泉數百種，他幼時恆喜玩弄，意欲有所增益而不可得，適無錫南郊外居民掘得古錢一罌，皆唐以前物，其尊人買得精品數百枚以畀之。光緒丁酉年間，初來上海，在鑑古齋選購元泉甚多，又在尙古齋購得宋泉數百種。後就譯學館之聘，日在琉璃廠各古玩肆縱覽，得方足布，尖足布，圓足布百餘品，於是大備。回滬後，購得晴韻館藏泉八百九十二品，價九百五十元，袁寒雲藏泉一篋，價千五百元，又常選購古泉於廣東路古玩市場，累年不間，其所收之泉，上溯周秦，下迄遜清，無不完

備。且如六泉十布，各有四副，兩鎊金錯刀等，各有數十枚，其他精品，往往多至數百種，可謂富矣。丁先生嗜泉之癖，固數十年，泉學之深，洵非泛泛。海上藏泉家兩次組織古泉學會，皆舉先生爲會長，並曾按季出古泉學一冊。又成古泉有裨實用談一卷，復刊印泉志菁華錄。又依說文詁林例，彙集中東諸家泉說，以拓本影印，成古錢大辭典十二冊及拾遺一冊，繼以大辭典編例，用筆劃分先後，恐人失其系統，乃依時代編次，成歷代古泉圖說二冊，復博引史志，旁及各家考證，成歷代泉譜二冊，然古錢爲數多而類複雜，再本韓文公提要鈎玄之意，成古泉學綱要一冊。其他有關古泉之丁氏著作計有十餘種。丁先生不僅是一個古錢收藏家，更不愧古錢學的專家。

精研佛學算術詩文 先生研究佛學，最初在三十二歲，那時在譯學館，自俄文教習余梅生處借讀釋氏語錄，錄其中警語標爲座右，此爲讀佛書之起原，先生因學佛者無人手起信之書，遂編佛學撮要，佛學初階，佛學指南等書。四十四歲篤究佛經，開始箋注經典，於四十六歲時並輯成佛學大辭典十有六冊。

四十年前自認爲將以算學終身隱於疇隱人之間而別署疇隱的丁先生，對於算學的研究當然是不憚煩勞的了。二十四歲時，他除治經史外，兼習勾股測量等法；次年謁華若汀先生於蕩口，談代數學甚久，又以算學考入南菁書院，受業於華若溪先生，不數年受張文達公之聘入京爲京師大學堂譯學館算學及生理學教習，月薪一百六十元，凡二年有半，積四千元，以非其所好，三十二歲，力辭返滬。寓滬整理算稿，成筆算數學，代數備旨，八綫備旨，形學備旨詳草，次第刊行。先是，丁先生於赴京執教之前，爲無錫埃實學堂算學教

習，庚子撰算學書目提要，刊之，此爲刻書之始。

除了以上分述的醫學，文字學，古泉學，佛學，算學等以外，丁先生對於詩文亦有相當的成就。著作有陶淵明詩箋註，漢魏六朝名家集，全漢三國晉南北朝詩，八代詩菁華，錄宋九僧詩，歷代詩話續篇二十八種，清詩話四十二種及詩鑰等。

寫這篇文章底目的，與其說是稱頌丁福保先生的道德文章，不如說是要引起人們對於這位老先生的注意，向他效法向他學習。先生研究各種學術，悉欲使之成爲有用之學，非藉以誇世而彰身。在他六秩晉九的榮慶，在他著述五十年紀念的季節，我們其實不必說上一套祝頌的話。最主要的就是該效法他高尚純潔的人格，捨己服務的精神，多才多藝的智識，律己恕人的態度，忠厚坦白的氣概，樸實敦儉的習慣，堅決沈毅的魄力，和其他一切一切的優點。要是我們應該爲他祝壽的話，那末我們不僅要向他進一觴，恭祝他福壽無疆，還要踏上他已經走過的路，前進，前進，恭祝我們自己前程無量。

第八章 捐助

十住毘婆沙論曰。菩薩以真智慧。如是知施與已。是我物。在家者。非我物。物施已。則堅牢。在家者。不堅牢。物施已後世樂。在家。少時樂。物施已。不憂守護。在家者有守護苦。物施已。愛心薄。在家者增長愛。物施已。無我所。在家者是我所。物施已。無所屬。在家者有所屬。物施已。無所畏。在家者多所畏。物施已助善提後。在家者助魔後。物施已。無有盡。在家則有盡。物施已。從得樂。在家從得苦。施已。捨煩惱。

在家。增煩惱。施已。得大富樂。在家。不得大富權。施已。大人業。在家。小人業。施已。諸佛所歎。在家。愚癡所讚。

佈施一端，向爲我佛所讚嘆，此論說理真確，非具無上上智不能道，回憶余歷年捐助圖書物品及地產之可得而述者，四十五歲，余以大宗書籍捐入無錫縣立圖書館及埃實學堂圖書館。

四十七歲，十二月教育部因余捐平民學校鉅款，特授余捐貲興學褒章執照一紙及獎給金色二等褒章一個，

四十八歲，續捐大宗書籍於無錫第一高小學校圖書館，內有讀畫齋叢書及士禮居叢書等。近年來，親友之借款者，數目頗不少，余以借據單契等物，皆按戶寄還，作爲饋贈之資。

廿三年，上海市政府籌建麻瘋療養院，余捐助銀幣一千元。

廿四年，余捐助上海市政府圖書館書籍萬五千卷。

廿五年，余將所得晴韻館主人舊藏古泉，計八百九十二品，捐贈上海市博物館。

廿六年，吳淞衛生事務所，於貧民頗有益，余捐助千元，是年又捐贈古泉一份於光華大學。

上海福幼院成立，余以藏書萬卷，捐入該院，並捐助大宗木器，充實該院設備。

震旦大學將余所捐大宗圖書，闢一丁氏文庫，並約定得送免費生二名，讀至大學畢業爲止。

無錫公園前余有住宅二十餘間，茲捐助淨業社及佛學會，爲建造三聖閣及研究經典之所，比較余個人保存，必能永久。

三十六年秋，余又以大宗圖書捐助市立圖書館。

三十七年農曆六月二十二日，爲余七十五歲壽辰。是日次兒惠康，將其所藏之臺灣高山族標本全部，捐贈國立浙江大學供諸生研究，爲余留永久紀念。聞浙大已特闢西湖博物館展覽室五大間，藉供陳列云：

第九章 社會服務

余歷年參加各公團，被舉董事委員等職如：上海衛生教育社董事、南坡兒童醫院董事、無錫中國醫藥日報社董事、中國醫學雜誌社董事、中國醫學專修院名譽院長、世界提倡素食會會長、虹橋療養院董事長、中山聾啞義務學校校董、勝利博物館籌備委員會委員、上海佛教醫院院長、上海私立尙宗小學董事、麻瘋救濟會董事、菩提法會董事、錫金公所董事、無錫同鄉會董事、佛光療養院董事長、上海孔聖學會會長、上海福幼院院長兼董事長、上海市佛教會理事、上海市利羣會理事長、上海市覺育學社理事長，上海中一大學校董。凡廿餘處，余大半不就，不肯擔任，恐念想誼動，壞我靜功也。

第十章 素食主義

楞伽經云。食肉之人。斷大慈種。我觀衆生。輪迴六道。迭爲父母六親眷屬。更相瞰

肉。無非親者。常生害心。增長苦業。流轉生死。不得出離。此殺業重重。積而爲劫運之所由來也。本集言之綦詳。余不必復贅。茲錄美國米勒耳博士之學說。以科學來證明蔬食戒殺之真理。

米勒耳博士之言曰。常人每以爲肉類乃食物中之上品。此種謬誤。尤以東方之人民爲更甚。或竟謂『泰西文明諸國之所以能文化先進。日益富強者。蓋以其國民多用食肉之故也』。以是中上之家，凡財力之所能及者。皆以肉食爲滋補。此種心理。實屬大謬。推究食肉之唯一原因。乃因其味鮮美。以貪口腹之慾而已。故嗜肉食者。大有一日三餐。非肉不飽之概。茲爲使一般誤以肉食爲滋養者。明瞭其真相起見。特介紹全球最著名之飲食學專家拿奧登氏。對於食物中礦物質之含量之言曰。『吾人必須特別注重於多食蔬菜及水果。以其極有關於身體之正常發育。與夫體內各部分之機能也。甚至對於兒童。吾人以爲與其仍如通常習慣之視孩童爲食肉動物。實不如以最純素飲食飼之爲愈也』（按氏對於人類及其他動物之飲食學上。有久長精細之實驗）又休門氏在演講礦物質之重要時。曾謂『肉類中之石灰質極少。故其所含之蛋白質及磷質雖極多。但過分偏於一面。非良好之食物也』。美國著名之約翰霍金氏醫院麥克隆醫師爲近世有數之食物專門家。嘗向醫師演講云。『余對於蔬食。並無絲毫之懷疑。若能佐以多量之牛乳。實爲人類最適宜之食物』。又云。『余覺汝等若採用此種食物。最爲安全。且汝等之病人。必能迅速痊癒。較諸現在許多最上等之醫院。用五穀植物肉類等食物。以飼患消瘦病者。或經外科手術後之病人。其病體復原之遲速。不可同日而語。肉類雖味甘色美。然余確信嗜之過甚。實非吾人適

宜之食物也。余在過去三十年之經驗中。對於病人之食物。頗有研究之機會。嘗作多次之實驗於病人之滋養問題。此外在醫院工作之護士。及職員等。雖身體康健。亦在被試驗之列。俟經蔬食者與肉食者比較之結果。余乃深信戒肉食者之有益於身體。凡病人之用蔬食者。其體重之增加必較速。而其身體各部所患之疼痛亦較少。且其傷口之癒合迅速。頗為顯著。而其體力之能持久。又遠勝於慣用厚味肉食之人。自古以來。在各種體育競賽中之獲勝利者。多知蔬食之能使其體力持久。故若欲比賽獲勝。必先慎戒肉食。一九〇七年三月間。大學教授弗肖氏。在耶魯醫學報內。嘗刊佈其有趣味之試驗例。如左。

其試驗為兩臂平展運動。第一次比賽結果。蔬食者頗佔勝利。即肉食者最高之紀錄。祇及蔬食者之尋常紀錄。據云。肉食者十五人中。能平展兩臂至十五分鐘者。僅二人。而蔬食者三十二人中之能超過十五分鐘者。佔二十一人。且此二十二人中之能持久至半小時。或半小時以上者。更有十五人。而肉食者則無一人能之。此外能將兩臂維持至逾一小時之久者九人。逾二小時之久者四人。逾三小時之久者一人。皆為蔬食者。

不甯唯是。凡疾病盛行之國家。其國民食肉必多。如毒瘤、癌腫、腎炎、神經錯亂、消化不良、大便閉結、膽石、中風、血壓過高等病。極為常見。而其壽命之平均數。勢必極度減低。反之。凡蔬食之人民。其壽數必高。其所患之上述諸症。極為少見。蓋其抵抗疾病之能力較強。且其智能與體力在質與量方面。亦均較優也。凡此種種。事實俱在。勿容疑慮。且各飲食專家。皆已確切言之矣。故對於素食之有益於人類。似無再加討論之必要。總之。不論其階級、生活、職業之如何。凡係一種均勻之純蔬飲食。決不致有害於身

體。抑且能儘量供給體內所需之各種要素也。

以上皆米博士之說。讀此亦可以詳知不可食肉之原理矣。余近三十歲時。常閱某督教會中出版之衛生學書。謂每日宜食各種肉類。又宜多食魚。魚皮多磷質。食之有益。余信以爲然。每日午夜二餐。皆至青年會食西菜。專吃動物。如是者幾一年。而健康毫無進步。適伍廷芳先生來上海。開慎食衛生會。禁食動物。提倡素食。余始而疑之。繼而信之。終則奉行不輟。以至於今。今則美國德國。素食之風。已大行矣。而余亦健康日益增進。始知素食之果優於肉食也。茲將五十餘年中經驗之結果。作一簡短之語。而告閱者諸君曰。余選閱高年人傳及墓誌等數百篇。得其所以長壽之法。復益以近世科學上必要之條件。其說如下。曰。不食肉。不飲酒。節慾。善飯。多吃水果。多吃菜蔬。要特別多吃赤豆黃豆。多得空氣日光。每日多走路。每日有極通利之大便。每日能酣睡。又要孝弟。勤儉。退讓。淳厚。快樂。濟人。惜福。忍辱。曠達。靜坐。念佛。無煩惱。無憤怒。無妄言邪行。爲善不求人知。果如是。未有不長壽者。亦未有不免近年之劫數者。然其事必先從戒殺護生不食肉類始。

第十一章 衛生卻病法

(一) 每日日出即起，用冷水摩擦周身。(二) 早起後宜飲熱湯一二杯，隔半鐘點始食早餐。(三) 早餐後隔五點鐘始食午餐，午餐後隔五點鐘始食晚餐，每餐不宜過飽爲妙。(四) 一日三餐之前後，不用點心，一切閒食，不食爲貴。(五) 食宜緩，嚼宜細

嚼，嚼至嚼無可嚼，始咽下。（六）晚餐後隔三點鐘方可就寢。（七）每夜至少睡足八點鐘，冬日不可以被覆首，睡時以下午十點鐘爲限。（八）寢室宜通風，牀前屏風障之，免得風之直射人身。（九）每日宜多運動，宜走路三四里。（十）每日宜在日光之下，空氣潔淨處，挺身直立，緊閉其口，用鼻孔盡力呼出炭氣，吸入空氣，每日三四次，每次十餘呼吸，營養肺體，莫妙於此。（十一）紙煙旱煙水煙，均不可吸。（十二）陳酒膏粱外國酒，均不可飲。（十三）一切魚肉類，皆含毒質，能戒絕最佳。（十四）不可使色慾有發動之機會，平時宜用強制功夫，老氏曰：『不見可欲，使心不亂』。廣成子曰：『無勞汝形，無搖汝精，乃可長生』。（十五）房事與年齡相應，不可過度，春秋繁露曰：『新壯者十日而一遊於房，中年者倍新壯，始衰者倍中年，中衰者倍始衰，大衰者之月，當新壯之日』。（十六）每日大便一次，便閉結者，宜多食菜蔬水果。（十七）每日宜多洗刷齒牙，若齒牙有病，宜速醫補。（十八）衣服宜寬，宜鬆，宜輕，宜薄，宜稍涼，宜清潔。（十九）每日作事須有一定時刻，某某時作某某事，宜嚴守規則，不可遷就，作事滿一句鐘，宜休息片刻，以舒腦力。（二十）每日宜學大笑數次，凡歡笑最有益於人，能補腦髓，活筋絡，舒營衛，消食滯，而四周之聞笑者，亦報之以笑容，彼此俱有大益。（二十一）小病不可服藥，冬日禁服膏方，小病本二三日可自愈者，往往因不對症之藥而遲至六七日始愈，冬令膏方能使人消化力減少，或生濕或太燥，不食爲妙。（二十二）自治宜嚴，心中無不可對人之事，則心曠體胖，夢寐亦安。

著者按，吾人處艱難之世，宜薄滋味，節嗜慾，耐寒冷，以堅苦卓絕之毅力，煅煉其

身體，以變化其氣質，一旦處奮鬪生涯中，可以歷千辛萬阻，不許有半個難字出口，愈困難，愈顛危，我必有駕而上之之毅力，以戰退此羣魔，而不爲其所困，吾儕少年，其勉乎哉。

右列之却病法二十二條，宜以猛鷲慄悍百折不回千夫不撓之勇氣行之。



中華民國捌拾玖年伍月陸日繳

中華民國三十七年八月出版

著者兼
出版者

無錫丁福保

發行所

話林精舍出版部

上海大通路二二七弄六號

◎另有「疇隱居士七十自敘」由中華書局發行

國家圖書館



001687626



2.886

35:7

籍

